

## **De Beebaa go Nehemiah Hanu dagodo o de beebaa nei**

Agu made *De Beebaa go Nehemiah* go Nehemiah ne siia madali Ezra, i daha denga ngadau e 445-443 B.C. Gai e maua i de vvae haa:

1. De ahe o Nehemiah gi Jerusalem, i de masavaa a de hodoologi o Persia, ne kave ai ia e hai ai de goobenaa o Judah.
2. De hagaduu age ange de buibui o Jerusalem.
3. De dau a Ezra hainga a de Maadua, ma de tala a dangada olaadeu haisala.
4. Hanu hegau ange a Nehemiah ne hai.

Dahi mee laumalie e gidee i lo te beebaa nei, go dagodo de hagadonu a Nehemiah de Maadua, ma dono dalodalo ange gi de ia i masavaa alodahi.

Dahi gubu hagamogomogo: “Dua huu e madalima ma lua laangi, gai de buibui gu lava, i de madalua ma lima laangi o de malama go Elul. Gai ga langona huu e omaadeu hagadaumee alodahi mee nei, gai denga huaahenua alodahi i luoomaadeu baasi gu maatagu, ma de dookaa; gilaadeu gu tonu iho bolo de hegau nei gu sula, i hiidinga de bale a demaadeu Maadua” (6.15-16).

### **Denga vaevaenga**

De ahe o Nehemiah gi Jerusalem (1.1–2.20)

De hagaage age de buibui o Jerusalem (3.1–7.73)

De dau o denga hainga, ma de hagahoou o de hagatoo donu hagaheloongi (8.1–10.39)

Hanu hegau ange a Nehemiah ne hai (11.1–13.31)

*Talodalo a Nehemiah*

<sup>1</sup> Muna a Nehemiah, tama daane a Hacaliah.

De malama huu go Kislev,\* i de madalua ngadau,† i dogu masavaa nogo noho ai i de madaaolo go Susa,

<sup>2</sup> gai Hanani, dahi ogu dangada, ne humai i Judah madali hanu daane, gai au ne ssili ange gi gilaadeu dagodo o de gau Ssuu gu aahe laa gi de henua, aama dagodo o Jerusalem.

<sup>3</sup> Gai gilaadeu ga hai mai, “Dangada ne ola ga nnoho i de henua gu hai ngadaa mmao ma de hagadookaa olaadeu dagodo; de buibui o Jerusalem gu maoha, gai ono haitoga gu lava i de dudu i de ahi.”

<sup>4</sup> De masavaa huu aagu ne langona ai muna nei, gai au gu dangi. Gai au ne daemaha ogu lodo ma de hagahiigai aama de dalodalo ange gi de Maadua o de langi i hanu laangi.

<sup>5</sup> Au ne hai ange:

“TAGI MAOLUNGA de Maadua o de langi, gai se Maadua maolunga ma de hagamaatagu, gai e daohi dau hagatoo donu heloongoi ma doo abodonu ange gi gilaadeu e aaloha i de goe aama de daohi au muna;

<sup>6</sup> hagahuuhulia mai luoo dalinga ma luoo mada, mage hagalaangona talodalo a doo dangada hai hegau, e dalodalo ai i mada luoo mada i de laangi

---

\* **1:1** Kislev e bei go daha Laaga (November) ma Daholaa (December). † **1:1** de madalua ngadau e bei go de madalua ngadau o Artaxerxes ne hodoologi ai.

ma de boo i dagodo o de gau Israel, oo dangada hai hegau, ma de tala adu haisala o de gau Israel gu haisala adu ai gi de goe. Ni muna abodonu, gimaadeu ma ogu dubuna madagidagi gu haisala adu donu gi de goe.

<sup>7</sup> Gimaadeu gu hai hegau baubau adu donu gi de goe i demaadeu dee daohi au hainga ma au muna gu hagasauaa, aama au hagamodu gu lava i de gaavange gi doo dangada hai hegau go Moses.

<sup>8</sup> Hagamaanadu i au muna gu tala ange gi Moses, ma gu hai ange, ‘Noo goodou e dee hai hegau i de muna abodonu, gai au e hai naa goodou gi mavaevae saele i denga huaahenua ange laa,\*

<sup>9</sup> aagai noo goodou e aahe mai gi de au, ma de daudali i agu muna gu tala adu gi goodou, e dee galemu donu goodou gu mavaevae saele gi de bido laa o henua i lalo, gai au e hagahe mai naa donu goodou gi de mommee aagu gu hili e dugu ai dogu ingoo.’\*

<sup>10</sup> Gilaadeu go oo dangada hai hegau ma au dangada gu hagao i doo sauua ma doo lima mmahi.

<sup>11</sup> Dogu Ia Aamua, aude haihaia hagalaangona dalodalo a doo dangada hai hegau ma dalodalo a oo dangada hai hegau, e malangilangi laa i de hagdubu i doo ingoo. Haia gi sula hagatau a doo dangada hai hegau ailaa nei, ma de abodonu mai gi de au i mada i mua o taane nei.”

De masavaa laa gai go au tangada e daohia de unu a de hodooligi.

---

\* **1:8** Lev 26.33      \* **1:9** Deut 30.1-5

## 2

### *De hano o Nehemiah gi Jerusalem*

<sup>1</sup> Gai de malama huu go Nisan,\* i de madalua ngadau o de hodoologi go Artaxerxes, i de masavaa ne gaamai ai uvaini gi de ia, gai au ne kave denga uvaini ga gaavange gi de hodoologi. Gai tigi ai ange donu se masavaa oogu ne lodo baubau ai, i ono mada i mua.

<sup>2</sup> Gai de hodoologi ne ssili mai gi de au, “Ni aha ouu e lodo baubau ai naa, gai koe e dee magi donu? De mee nei ne hidi mai donu i de daemaha oo lodo.”

Gai au gu madagu mmao,

<sup>3</sup> aagai au ne hai ange gi de hodoologi, “Gi daulooloa de mouli o de hodoologi! Gai gu aha gu dee lodo baubau ai au, gai de aduhale iai daanunga o ogu dubuna madagidagi e maoha ma e dagodo ai, ono haitoga gu dudu ma gu maoha?”\*

<sup>4</sup> Gai de hodoologi ne ssili mai gi de au, “Se aha aau e lodo e dangidangi mai ai gi de au?”

Gai au ga dalodalo ange gi de Maadua o de langi.

<sup>5</sup> Gai au ga hai ange gi de hodoologi, “Noo de hodoologi e malangilangi, gai noo koe e abodonu mai gi de au doo dangada hai hegau, gai koe dugua mai au gi hano gi Judah, gi de aduhale iai daanunga o ogu dubuna madagidagi, gai au ga hagaahе age de aduhale laa.”

<sup>6</sup> Gai de hodoologi ne hai mai gi de au, (de hine hodoologi e noho hogi i ono gaogao,) “Dee hee maa taulooloa doo hano, gai go aahee maa ouu e ahe mai ai?” Gai de hodoologi ne malangilangi i de

---

\* **2:1** Nisan e bei go daha Manu (March) ma Idiidi (April). \* **2:3**  
2 Ki 25.8-10; 2 Ch 36.19; Jer 52.12-14

dugu mai au gi hano; gai au ne tala ange dogu masavaa e hano ai aama de ahe mai.

<sup>7</sup> Gai au ne hai ange gi de hodooligi, “Noo de hodooligi e malangilangi, gai haia gi siia hanu leda e kave madali au e gaavange gi dagi o denga vaaenga i baasi dai o Euphrates, gilaadeu gi dugua mai ai au gi hano laa lodo olaadeu vaaenga e hano ai gi Judah.

<sup>8</sup> Gai siia hogi dahi leda ange gi Asaph, taane e diiloo ange de gelegele o de hodooligi i lodo henua, gai ia ga gaamai ai laagau e hagatuu ai denga haitoga, o de hale buibui makaga i gaogao de *temple*, ma de buibui o de aduhale, aama dogu hale e noho ai.” Gai de hodooligi ne dugu mai mee alodahi oogu ne dangidangi ange ai, go hiidinga de lima sauua o de Maadua e dagodo i ugu elunga.

<sup>9</sup> Dua mee laa gai au ne hano ga dae gi daho denga goobenaa o denga vaaenga i baasi dai o Euphrates, ga gaavange gi gilaadeu denga leda mai i daho de hodooligi. De hodooligi ne hai hogi hanu dagi o denga daane hebagi ma hanu daane e saavini i denga hoosa gi hulo madali au.

<sup>10</sup> Aagai de masavaa huu a Sanballat taane Horon, ma taane hai hegau go Tobiah, taane Ammon, ne langona ai mee nei, gai gilaau gu dee llo do i de humai o dahi dangada e balea ange de gau Israel.

*De tilo dagodo o de buibui o Jerusalem*

<sup>11</sup> Gai au ne hano gi Jerusalem ga noho ai i e dolu laangi.

<sup>12</sup> Gai gimaadeu ma hanu daane ne maalanga ga hulo i de boo. Gai au tee tala ange donu gi dahi dangada daudahi, mee a dogu Maadua gu gaamai

au gi haia i Jerusalem. Teai ange hogi manu madali au, go de manu donu huu oogu e gage laa.

<sup>13</sup> Au ne hano i de boo laa lo te Haitoga i de Geelonga e hano laa gi de Vai Geli o de *Dragon* ga hano ai gi de Haitoga o Duudae. Gai au ne tilo denga mommee i de buibui o Jerusalem gu maoha laa, ma ono haitoga gu dudu laa ma gu maoha i de ahi.

<sup>14</sup> Gai au ne hagasoe ga hano gi de Haitoga o de Vai i gaogao de Vai a de Hodooligi, aagai de manu oogu e gage ai laa gu dee oo i de hano gi ui i kilaa.

<sup>15</sup> Gai au ne hanage hogi laa gaogao de geelonga i de boo laa ga tilo be aahee dagodo o de buibui, muli mai gai au ne huli ga ahe ga ulu gi lo te aduhale i de Haitoga o de Geelonga.

<sup>16</sup> Gai dagi o de henua tee iloo be go hee oogu ne hano aagena, aabe ni aha aagu ne hano ga hai; gai au tee tala ange hogi gi de gau Ssuu, ma de gau haimeedabu, ma de gau aamua, ma dagi o de henua, ma dangada e haia de hegau i muli mai.

<sup>17</sup> Gai au ga hai ange gi gilaadeu, “Goodou gu gidee de hai ngadaa odaadeu gu tuu ange aagena, i hiidinga Jerusalem gu maoha ma e ngadi dagodo, gai ono haitoga gu lava i de dudu. Loomai, gi-daadeu ga hagaduu age de buibui o Jerusalem, gi dee hagangadi mee ina ai gidaadeu.”

<sup>18</sup> Au ne tala ange hogi gi gilaadeu de noho o dogu Maadua i ogu daha ma dono abodonu mai gi de au, aama muna hogi a de hodooligi ne tala mai gi de au. Gai gilaadeu ne hai mai, “Gidaadeu ga daamada de hagaduu!” Gai gilaadeu ne hagad-abena e hai gi danuaa de hegau.

<sup>19</sup> Aagai ga langona huu e Sanballat, taane Horon, ma taane hai hegau go Tobiah, taane Ammon, aama Geshem, taane Arab, gai gilaadeu ga hakadanga ma de hagangadi mee gimaadeu ga hagataba, “Ni aha oodou ga hai naa? Goodou ga hai baasi ange naa gi de hodooligi?”

<sup>20</sup> Gai au ne hai ange gi gilaadeu, “De Maadua o de langi e bale mai naa gimaadeu e hagassula ai amaadeu hegau, gai gimaadeu, ono dangada hai hegau e daamada naa de hagarahe age; aagai goodou e deai donu soodou diba, be se heohi ange gi Jerusalem aabe se hagamaanadu.”

### 3

#### *De hagarahe age o de buibui o Jerusalem*

<sup>1</sup> De masavaa laa gai Eliashib tangada haimeedabu maolunga, ma de gau haimeedabu ange laa ne hagabuni ga hagaduu age de Haitoga o denga Ssiibi. Gai gilaadeu ga hagadabu de haitoga laa ga gaavange ono abaaba, ma de hagadabu mai i de mommee laa ga dae ai gi de Hale Dagitilo o de Lau, aama de Hale Dagitilo o Hananel.

<sup>2</sup> Gai denga daane o Jericho ne hagaduu de mommee e mua ange, gai Zaccur tama daane a Imri ne hagaduu de mommee e mua ange gi gilaadeu.

<sup>3</sup> Gai de Haitoga o Mamu go de hagadiilinga o Hassenaah ne hagarahe age. Gilaadeu ne hagatuu age laagau o de haitoga, ga gaavange ono abaaba, ma ono baalanga hagamakaga, aama ono laagau e hagamakaga ai.

<sup>4</sup> Gai Meremoth tama daane a Uriah, tama daane a Hakkoz, ne hagarahe age de mommee e mua ange. Gai Meshullam tama daane a Berekiah,

tama daane a Meshezabel ne hagaahē age de mommee e mua ange. Gai Zadok tama daane a Baana ne hai ange de mommee e mua ange.

<sup>5</sup> Gai de gau Tekoa ne hagaahē age de mommee e mua ange; aagai de gau aamua tee llodo e hagamaaha gilaadeu i hegau a delaadeu dangada aamua.\*

<sup>6</sup> Gai Joiada tama daane a Paseah, ma Meshulam tama daane a Besodeiah ne hagaahē age de Haitoga o Jeshanah; gilaadeu ne hagatuu age ono laagau ga gaavange ono abaaba ma ono baalanga hagamakaga, aama ono laagau e hagamakaga ai.

<sup>7</sup> Gai Melatiah taane Gibeon, ma Jadon taane Meronoth, ma denga daane Gibeon ma Mizpah, go de madaaolo o de goobenaa i baasi dai o Euphrates, ne hagaahē age de mommee e mua ange.

<sup>8</sup> Gai Uzziel tama daane a Harhaiah, de labagau o denga goolo, ne hagaahē age de mommee e mua ange gi gilaadeu. Gai Hananiah, de labagau o denga vai maanongi, ne hagaahē age de mommee e mua ange gi de ia; gilaadeu ne hagaahē age de buibui o Jerusalem mai i kilaa ga dae ai gi de Bae Lahalaha.

<sup>9</sup> Gai Rephaiah tama daane a Hur, tagi o dahi luu baasi o Jerusalem, ne hagaahē age de mommee e mua ange gi gilaadeu.

<sup>10</sup> Gai Jedaiah tama daane a Harumaph ne hagaahē age de mommee e mua ange gi gilaadeu, go gaogao dono hale. Gai Hattush tama daane a Hashabneiah ne hagaahē age de mommee e mua ange gi de ia.

---

\* **3:5** delaadeu dangada aamua, aabe delaadeu Ia Aamua.



11 Gai Malkijah tama daane a Harim, ma Hashub tama daane a Pahath-Moab ne dahi ange alaadeu mommee ne hagaahē age madali de Hale Dagitilo o denga Mommee Dao Mee.

12 Gai Shallum tama daane a Hallohesh, tagi o dahi luu baasi o Jerusalem, ma ana damaa hine, ne hagaahē age de mommee e mua ange gi gilaadeu.

13 Gai Hanun ma de gau Zanoah ne hagaahē age de Haitoga o de Geelonga. Gilaadeu ne hagaduu de haitoga ga gaavange ono abaaba, ma ono baalanga hagamakaga, aama ono laagau e hagamakaga ai. Gilaadeu ne hagaahē age e mano sugilima o de buibui, gai ne hano ga duu i de Haitoga o Duudae.

14 Gai Malkijah tama daane a Recab, tagi o Beth Hakkerem ne hagaahē age de Haitoga o Duudae; ia ne hagaduu age de haitoga ga gaavange ono abaaba, ma ono baalanga hagamakaga, aama ono laagau e hagamakaga ai.

15 Gai Shallum tama daane a Col-Hozeh, tagi o Mizpah ne hagaahē age de Haitoga o de Vai; ia ne hagaduu age de haitoga laa ga haoli ono elunga, ma de gaavange ono abaaba, ma ono baalanga hagamakaga, aama ono mee e hagamakaga ai. Ia ne hagaahē age hogi de buibui i luu baasi de Vai o Shelah i gaogao de veelenga a de hooligi, ga dae gi de gaagenga e hano iho laa i de Aduhale o David.

16 Gai Nehemiah, tama daane a Azbuk, tagi o dahi luu baasi o Beth Zur, ne hagaahē age de mommee e mua ange, ga hano ai gi dahi mommee i de baasi gee o denga daanunga o David, gai e

hano hogi ga dae gi de mommee gaugau ma de hale o denga daane dau.

<sup>17</sup> Gai go de aamuli o Levi ne haggaahea age de mommee e mua ange gi de ia: delaadeu dagi go Rehum, tama daane a Bani. Gai tangada e mua ange gi de ia go Hashabiah, tagi o dahi luu baasi o Keilah, ne sui dono vaaenga ga haggaahe age ai de mommee e mua ange.

<sup>18</sup> Gai Bavvai tama daane a Henadad, tagi o dahi luu baasi o de vaaenga go Keilah, ne haggaahe age de mommee e mua ange.

<sup>19</sup> Gai tangada e mua ange go Ezer tama daane a Jeshua, tagi o Mizpah, ne hagaduu age ange dahi mommee i de baasi gee o de mommee e hanage ai gi de hale e doange ai goloa hebagi i tege.

<sup>20</sup> Gai tangada e mua ange go Baruch tama daane a Zabbai, ia ne dahi ange ana mommee ne haggaahe age, go de mommee e daamada mai laa i tege, ga dae ai gi de haitoga o de hale o Eliashib, tangada haimeedabu maolunga.

<sup>21</sup> Gai tangada e mua ange go Meremoth tama daane a Uriah, tama daane a Hakkoz, ia ne dahi ange ana mommee ne haggaahe age, mai i gaogao de haitoga o de hale o Eliashib ga hano ai gi de bido o de hale laa.

<sup>22</sup> Gai de gau haimeedabu ne nnoho laa i kilaa ne haggaahe age de mommee e mua ange gi de ia.

<sup>23</sup> Gai de mommee i olaadeu dua, go Benjamin ma Hashub ne haggaahe age, gilaau ne haggaahe age de mommee i mada olaau hale. Gai Azariah tama daane a Maaseiah, tama daane a Ananiah ne haggaahe age de mommee i gaogao dono hale.

<sup>24</sup> Gai Binnui tama daane a Henadad ne hagahe age de mommee e mua ange gi de ia, mai i gaogao de hale o Azariah ga hano ai ga dae gi tege,

<sup>25</sup> gai Palal tama daane a Uzai ne hai hegau i de baasi gee o tege, ma de hale dagitilo e duu laa gi lunga i hongga de hale o de hodoologi, i gaogao de buibui o denga daane hagaloosi. Gai Pedaiiah tama daane a Parosh ne hagahe age de mommee e mua ange gi de ia,

<sup>26</sup> gai de gau hai hegau o de *temple* i Ophel ne hai age de mommee i de baasi gee de Haitoga o denga Vai i de baasi gi dua, aama de hale dagitilo e hano laa ma e sula gi lunga i kilaa.

<sup>27</sup> Gai de gau Tekoa ne hagahe age de mommee e mua ange gi gilaadeu, mai i de baasi gee o de hale dagitilo maolunga laa ga hano ga dae gi de buibui o Ophel.

<sup>28</sup> Gai hongga de mommee iai de Haitoga o denga Hoosa, go de gau haimeedabu ne hagahe age; dahi ma dahi ne hai ange de mommee i ma tono hale.

<sup>29</sup> Gai Zadok tama daane a Immer ne hai ange de mommee e mua ange i ma tono hale. Gai Shemiah tama daane a Shecaniah, taane e hagaloosia de Haitoga i baasi i Dua, ne hagahe age de mommee e mua ange gi de ia.

<sup>30</sup> Gai Hananiah tama daane a Shelemiah, ma Hanun togoono dama daane a Zalaph, ne hagahe age de mommee e mua ange gi de ia. Gai go Meshullam tama daane a Berekiah ne hagahe age de mommee e mua ange, i gaogao o dono hale.

<sup>31</sup> Gai Malkijah de labagau o denga goolo ne hagahe age de mommee e mua ange gi de ia, ga

hano ai ga dae gi de hale o de gau hai hegau o de *temple* aama de gau hagao mee i gaogao de Haitoga e Tilo ai Mee,<sup>†</sup> gai e hano ga dae gi de aabi i lunga i tege o de buibui.

<sup>32</sup> Gai magavaa o de aabi i lunga i tege ma de Haitoga o denga Ssiibi, go labagau o denga goolo ma de gau hagao mee ne hagaaha age.

## 4

### *De gau hai hegau ma de gau hagaloosi*

<sup>1</sup> Gai ga langona huu e Sanballat bolo gimaadeu e hagaaha age de buibui, gai gu dee heohi ange donu gi ono lodo, gai ia gu kona mmao de lili. Gai ia ga basa hakadanga i de gau Ssuu,

<sup>2</sup> i madamada o ono dangada ma de hagabuulinga hebagi o Samaria, ga hai ange, “Ni aha a de gau Ssuu baageaa nei e hai nei? E maua nei donu e gilaadeu i de hagaaha age hanu mee? Gilaadeu e hai naa alaadeu sigidaumaha? Gai e maua naa donu e gilaadeu i de hagalava mee nei i dahi laangi sogosogo? Gai e maua naa donu e gilaadeu i de hai hanu hadu i denga gainga gu lava naa i de dudu?”

<sup>3</sup> Gai Tobiah, taane Ammon, ne duu hogi madali ia ga hai ange, “Delaadeu bae e hagaduu age naa e maoha naa donu huu i de gage ai o de gaaduu de vao!”

<sup>4</sup> Gai au ne dalodalo ga hai ange, “Demaadeu Maadua, hagalaangona, go hiidinga gimaadeu gu hagangadi mee ina; hagaaha ange gi gilaadeu

---

<sup>†</sup> **3:31** de Haitoga e Tilo ai Mee, aabe de Haitoga o Hammiphkad.

alaadeu muna, gai haia gi noonoodia gilaadeu gi gaavee gi dahi henua gee.

<sup>5</sup> Aude degi ange donu gi mee olaadeu gu haisala ai, aabe gi haolia olaadeu haisala mai i mada luoo mada; go hiidinga gilaadeu gu hagadookaa de gau hagatuu.”

<sup>6</sup> Gai gimaadeu ne duudagi de hagaduu age de buibui alodahi, ga hai gu madohi lua age gi lunga, i hiidinga dangada ne llodo mmahi i de hai hegau.

<sup>7</sup> Aagai ga langona huu e Sanballat ma Tobiah, ma de gau Arabia, ma de gau Ammon, aama de gau Ashdod bolo goi duudagi huu de hagaage age o de buibui o Jerusalem, gai mommee masaavava laa gu dai buni ange donu, gai gilaadeu gu kona mmao de llili;

<sup>8</sup> gai gilaadeu ga hai dahi hagatau e loomai ai e hebagi ange gi Jerusalem, ma de hai gi hai ngadaa de aduhale.

<sup>9</sup> Gai gimaadeu ne dalodalo ange gi demaadeu Maadua, ma de dugu hanu dangada gi hagaloosia i de laangi ma de boo e buibui ai gimaadeu i gilaadeu.

<sup>10</sup> Gai dangada o Judah ne hagadaba, “De gau molimoli gu daalea, gai gimaadeu gu dee maua i de hagaduu age de buibui, i hiidinga de lagolago gainga.”

<sup>11</sup> Gai odaadeu hagadaumee gu hagataba, “Gilaadeu e dee angahia naa donu aabe e gidee taadeu masavaa e tae ai gi olaadeu magavaa, ga daa ai gilaadeu gu maakau ma de hai gi tuu de hegau.”

<sup>12</sup> Gai de gau Ssuu e paa ange laa gi gilaadeu ne loomai ga hai mai, gi gimaadeu i e madaan-

gahulu hanonga, “Gilaadeu e loomai naa i mommee alodahi olaadeu e nnoho ai ga hebagi mai gi gimaadeu.”

<sup>13</sup> Deelaa ai, au ne hai hanu dangada gi hagalooisia tua de buibui i mommee alodahi e maolalo ai laa de buibui. Au ne hili hanu dangada mai i denga hagadiilinga ma alaadeu gadilaasa, ma dao, aama alaadeu mee hholu gi hagalooisia.

<sup>14</sup> Gai dua huu dagu tilo dagodo o mee nei, gai au ga hidi age ga hai ange gi de gau aamua, ma denga dagi aama dangada ange laa, “Goodou aude maatagu i gilaadeu. Gai goodou manadua de Ia Aamua maolunga ma de hagamaatagu, gai goodou hebagi i hiidinga oodou daina daane, ma oodou dama daane, ma damaa hine, ma oodou bodu aama oodou hale.”

<sup>15</sup> Gai omaadeu hagadaumee gu langona e gilaadeu, bolo gimaadeu gu iloo alaadeu hagatau, gai de Maadua gu hai gi dee ssula alaadeu hagatau. Gai gimaadeu alodahi ga ahe ange gi de buibui, dahi ma dahi gi ana hegau.

<sup>16</sup> Mai i de laangi laa gai dahi luu baasi o ogu dangada hai hegau e hai hegau, gai de baasi ange laa e hagauda olaadeu dao, ma mee buibui, ma mee hholu, aama de kahu i olaadeu malo hebagi. Gai denga dagi ne tuu i dua o dangada alodahi o Judah,

<sup>17</sup> e hagaduulia laa de buibui. Gai dangada e molimolia mee ne hai hegau i dahi lima gai de lima ange laa e poo dono goloa hebagi,

<sup>18</sup> gai dangada alodahi e hagaduulia laa de buibui, e dau alaadeu gadilaasa i de masavaa

alaadeu e bae ai de buibui. Gai taane e ilihia laa de hanga manu e duu i ogu gaogao.

<sup>19</sup> Gai au ne hai ange gi de gau aamua, ma denga dagi, aama dangada alodahi, “De hegau nei se hegau hai ngadaa gai se mommee laumalie e hai ai, gai odaadeu mommee e hai hegau ai i hongga de buibui e dee hebaa, aagai e mmao odaadeu magavaa.

<sup>20</sup> Gai be go hee naa huu oodou e langona ai de ili o de hanga manu, gai goodou ga hagabuni mai gi omaadeu daha i kilaa. Gai taadeu Maadua e hebagi naa donu i odaadeu hiidinga.”

<sup>21</sup> Deelaa ai, gimaadeu ne duudagi de hai hegau; dahi luu baasi o denga daane e poo alaadeu dao mai i taiao ga dae ai gi de ssula age o denga heduu.

<sup>22</sup> Gai au ne hai ange gi dangada i de masavaa laa, “Dahi ma dahi ma dono dangada hai hegau gi nnoho i Jerusalem i de boo, gai gilaadeu ga hagaloosi ai i de boo, ma de hai hegau i de laangi.”

<sup>23</sup> Gai au ma ogu daina daane, ma ogu dangada hai hegau, aama denga daane hagaloosi ne loomai laa madali au, tee hagau donu omaadeu malo, gai dahi ma dahi ne poo dono goloa hebagi i dono lima madau.

## 5

### *De bale ange de gau hagaau aloha*

<sup>1</sup> Gai denga daane ma olaadeu bodu ne nnanu i hiidinga olaadeu dangada go de gau Ssuu ange laa.

<sup>2</sup> Gai hanu dangada ga hagataba, “Gimaadeu ma amaadeu dama e soa, gidaadeu ga hulo e gaamai

hanu *grain* e gaimée ai gidaadeu gi mouli ai gidaadeu.”

<sup>3</sup> Gai hanu ne hagataba, “Gimaadeu gu gaa-vange omaadeu alahenua ma amaadeu veelengaa *grape*, ma omaadeu hale, e hagadonu ai bolo gimaadeu e hagao amaadeu *grain* gu kave, i hiidinga o de onge.”

<sup>4</sup> Gai hanu ne hagataba, “Gimaadeu ne hai muli i hanu sseene e hagao ange ai taagisese o omaadeu alahenua, ma amaadeu veelengaa *grape* gi de hodooligi.

<sup>5</sup> Gai gimaadeu e bei donu dagodo o omaadeu dangada, gai amaadeu dama e bei dagodo o alaadeu dama, aagai gimaadeu e hai amaadeu dama gi ni dangada hai hegau. Hanu amaadeu damaa hine gu lava donu i de hai gi ni dangada hai hegau dee ilaage, aagai gu deai donu amaadeu mee e mau i de hai, go hiidinga omaadeu alahenua ma amaadeu veelengaa *grape* gu niio hanu dangada gee.”

<sup>6</sup> Au ne kona mmao dogu lili, i de masavaa aagu ne langona ai delaadeu tala muna nei.

<sup>7</sup> Gai au ne hagasaele mee nei i ogu lodo, gai au ne hagabaubau de gau aamua ma denga dagi, ga hai ange gi gilaadeu, “Goodou e hai oodou dangada gi hagao ina dahi mee laa hongaa oodou mee gu gaavange gi gilaadeu.” Gai au ne hagahi dahi hagabuni laumalie gai au ga hagasee ai gi gilaadeu,\*

<sup>8</sup> ga hai ange, “Gidaadeu ne hai hegau ange ga hagao mai odaadeu dangada de gau Ssuu gu

---

\* 5:7 Exo 22.25; Lev 25.35-37; Deut 23.19-20



hagao ange laa gi de gau henua gee. Aagai iainei goodou gu hagao gi daha oodou dangada, gai gilaadeu ga aahe ange ga hagao mai gilaadeu gi gidaadeu?” Gai gilaadeu gu dee mmuu, gu deai donu alaadeu muna e maua i de tala.

<sup>9</sup> Gai au ne hai ange, “Oodou hegau gu hai naa e dee heohi donu! E aha, e dee danuaa ange laa doodou maatagu i taadeu Maadua, gi dee dookaa ai gidaadeu i denga huaahenua o odaadeu haggadaumee?”

<sup>10</sup> Gai gimaadeu ma ogu daina ma ogu dangada ne dugu ange hogi dangada gi hai muli mai i sseene ma *grain*. Aagai gidaadeu e dee kave dahi mee laa hongamee olaadeu e hai muli ai.

<sup>11</sup> Ailaa nei gai goodou haggaahe ange olaadeu alahenua, ma alaadeu veelengaa *grape*, ma veelengaa *olive*, ma olaadeu hale, ma sseene, ma hua *grain*, ma uvaini hoou, ma lolo alodahi oodou gu hai naa gilaadeu gi hagao ina adu gi goodou.”

<sup>12</sup> Gilaadeu ne hai mai, “Gimaadeu e haggaahe ange donu mee nei. Gai gimaadeu e dee kave hanu mee mai i olaadeu daha. Gimaadeu e hai naa donu gi bei au muna.”

Gai au ga hagahi de gau haimeedabu, ga hai de gau aamua ma denga dagi gi hagatoo donu bolo gilaadeu e hai gi bei alaadeu mee gu hagatoo donu ai.

<sup>13</sup> Gai au ga luuluu ogu malo, ga hai ange, “De Maadua gi luuluu ina gi doo mai i dono hale ma ono golea tangada e dee haia gi bei de hagatoo donu nei. Gai ia gi luuluuia ina ga dae ai gi de odi ana mee.”

Gai de hagabuulingaa dangada alodahi laa ga hai ange, “Amen!” Gai gilaadeu ga tuhi TAGI MAOLUNGA. Gai dangada alodahi ne hai donu ga bei de hagatoo donu laa.

<sup>14</sup> Mai i de laangi oogu ne dae ange ai ga goobena i de henua go Judah, mai i de madalua ngadau o Artaxerxes ne hodooligi ai, ga dae ai gi de matolu ma lua ngadau, se madaangahulu ma lua ngadau, gai teai donu se gimaadeu ma ogu dangada ne gaimee i tuuhanga o gai e gaavange laa gi de goobena.

<sup>15</sup> Denga goobena i ogu mua ne hai ga hai ngadaa dangada, i delaadeu kave gai ma uvaini mai i olaadeu daha, madali e madahaa *shekel*\* selevaa, gai olaadeu dangada hai hegau ne vaivai hai hogi dangada. Aagai au tee hai hegau bei gilaadeu, i hiidinga au e madagu i de Maadua.

<sup>16</sup> Gai au ne hagaduu ngae ga hagaduu age de buibui nei; au tee hagao hogi hanu alahenua, gai ne hagabuni mai ogu dangada hai hegau alodahi ga hai de hegau i kilaa.

<sup>17</sup> Gai e dahi ange mee, e 150 daane Ssuu ma dagi e gaimee madali au, madali dangada alodahi mai i denga huaahenua e paa mai gi de henua.

<sup>18</sup> Gai aanei gai ne hagadabena mai gi de au i dahi laangi: e dahi kaau daane, e ono ssiibi pedi, ma hanu manu llele, gai denga madaangahulu laangi alodahi gai e lagolago hagadaangan-gaa uvaini. Gai e dee galemu de hanu mee nei, aagai au tee kave donu tuuhanga e vvae ange laa

---

\* **5:15 40** *shekele* bei se dahi pauni.

gi de goobenaa, go hiidinga e hai ngadaa ange gi dangada.

<sup>19</sup> Dogu Maadua, koe gi manadua mai au i doo abodonu, i agu mee alodahi gu hai ange gi de huaadangada nei.

## 6

### *De hai baasi ange gi Nehemiah*

<sup>1</sup> Gai ga langona huu e Sanballat, ma Tobiah, ma Geshem taane Arab, aama omaadeu hagadaumee ange laa, bolo gu hagarahe age de buibui, gai gu deai donu mommee e masaavava, (gai tagodo donu, tigi ai donu abaaba o denga haitoga o de aduhale,)

<sup>2</sup> gai Sanballat ma Geshem ne aalu mai ga hai mai, “Humai, gidaadeu ga hedae i lo te duu malaetae o Ono.” Aagai gilaau ne maanadu de hai mai dahi doo gi de au.

<sup>3</sup> Gai au ne hai gi hulo hanu dangada gi hai ange, “Au e hai dahi hegau laumalie, deelaai, au e dee maua i de hanadu. Gai ni haigamaiana aha dagu tuu de hegau, gai ga hanadu gi oodou daha?”

<sup>4</sup> Gai ne haa hanonga alaadeu ne aalu mai ai au, gai au ne tala ange muna mau gi gilaadeu, i denga hanonga e haa laa.

<sup>5</sup> Gai Sanballat ne hai ange hogi gi humai dono dangada hai hegau gi ogu daha i de lima hanonga, gi gaamai dahi leda e deai se mee e hagapigi iai.

<sup>6</sup> Gai aanei muna e sisi ai: “Gu tala i daho denga huaahenua — gai Geshem ne hagadaba bolo ni muna abodonu — bolo goodou ma de gau Ssuu gu nnoho e hai baasi, deelaai, goodou e hagaduu

age de buibui naa. Gai au gu langona hogi bolo koe e lodo e hai go delaadeu hodoologi.

<sup>7</sup> Gai koe gu hai hogi denga pelaabisi gi daalaa oo dagodo i Jerusalem gi hagataba, ‘E dahi hodoologi i Judah!’ Gai iainei e hagailoo ange naa gi de hodoologi bei dagodo o muna nei. Deenei ai, humai gai gidaadeu ga madaangudu alodahi i dagodo o mee nei.”

<sup>8</sup> Gai au ne aalu ga hai ange: “Tigi ai donu mee bei au mee e tala naa gu hai; gai ni maanadu donu huu niiu ne hai.”

<sup>9</sup> Gai gilaadeu ne hagatale de hagamaatagu gimaadeu, gilaadeu ne maanadu, “Gilaadeu e baageaa naa i de hai hegau, gai de hegau gu dee maua gi lava.”

[Aagai au ne dalodalo, ga hai ange, “De Maadua,] koe gi haia gi mmahi au.”

<sup>10</sup> Gai au ne hano gi de hale o Shemaiah, tama daane a Delaiah, tama a Mehetabel, ia gu dee maua i de hano saele gu noho donu huu, gai ia ne hai mai, “Gidaau ga hedae i de hale o de Maadua i lo te *temple*, gai gidaau ga hagamakaga denga abaaba o de *temple*, go hiidinga gilaadeu e loomai naa e daa goe gi magau, aaboo nei donu gai gilaadeu e loomai e daa goe gi magau.”

<sup>11</sup> Aagai au ne hai ange, “E maua naa donu taane bei au e savini e mmuni? Gai e maua e tangada bei au i de hano e ulu i lo te *temple* e hagaola ai dono mouli? Au e dee hano donu!”

<sup>12</sup> Gai au gu donu ange bolo e dee go de Maadua ne haia ia gi humai, aagai ia ne basa pelaabisi ga hai baasi mai ai gi de au, go hiidinga Tobiah ma Sanballat gu hagao ange ia.

13 Gilaau ne hagao ange ia gi haia gi madagu au, gi haisala ai au i de hai de hegau nei, ma de hagabaubau ina ai dogu ingoo, gai gilaadeu ga hagadogaa ai au.

14 Dogu Maadua, koe gi hagamaanadu i hegau baubau a Tobiah ma Sanballat ne hai, ma Noadiah, de hine pelaabisi, aama denga pelaabisi alodahi ne llodo laa e hagamadagu au.

*De lava o de buibui*

15 Dua huu e madalima ma lua laangi, gai de buibui gu lava, i de madalua ma lima laangi o de malama go Elul.\*

16 Gai ga langona huu e omaadeu hagadaumee alodahi mee nei, gai denga huaahenua alodahi i luoomaadeu baasi gu maatagu, ma de dookaa; gilaadeu gu tonu iho bolo de hegau nei gu sula, i hiidinga de bale a demaadeu Maadua.

17 De masavaa laa gai ne lagolago donu leda a de gau aamua o Judah ne kave gi Tobiah, gai Tobiah ne gaamai hogi denga leda gi gilaadeu.

18 Gai ne soa dangada Judah gu hagatoo donu ange gi de ia, i hiidinga ia go ssaulaba o Shecarniah, tama daane a Arah, gai dana dama daane go Jehohanan gu hai bodu ange gi tamaa hine a Meshullam, tama daane a Berekiah.

19 Gai gilaadeu e tala hagadanuaa mai ia gi de au aama de hagailoo ange gi de ia agu muna gu tala. Gai Tobiah ne gaamai denga leda e hai ai au gi madagu.

---

\* 6:15 *Elul* e bei go daha Maidigi (August) ma Mailaba (September).

# 7

## *De hili o denga dagi*

<sup>1</sup> Gai de masavaa huu ne lava ai de buibui, gai au gu hagabigibigi ange ono abaaba ma de hili ange dangada e hagaloosia denga haitoga, ma de gau daahili, aama denga daane de aamuli o Levi.

<sup>2</sup> Gai au ne hili dogu daina daane go Hanani, ma Hananiah tagi o de hale dagitilo gi dagina Jerusalem, go hiidinga ia se daane e hai hegau i de muna abodonu ma de madagu i de Maadua, gai e deai ange donu se daane e bei ono dagodo.

<sup>3</sup> Gai au ne hai ange gi gilaau, “Gooluu e dee hhuge denga haitoga o Jerusalem ga dae ai gi de masavaa e hagavvela ai de laa. Gai de masavaa o de gau hagaloosi goi hai hegau ai, gai gilaadeu gi bonodia denga abaaba ma gi hagamakaga ina. Gai hilia hogi de gau hagaloosi mai i dangada e nnoho laa donu i Jerusalem, dahi ma dahi gi duu gi hagaloosia gaogao dono hale donu.”

<sup>4</sup> Gai de masavaa laa gai de aduhale gu lahalaha ma de laumalie, gai e sogoisi donu dangada e nnoho ai, tigi ai hogi hale ne hagatuu.

## *Dangada ne aahe mai gi de henua (Ezra 2.1-70)*

<sup>5</sup> Gai dogu Maadua ne gaamai gi ogu lodo de hagabuni de gau aamua, ma denga dagi ma de gau ange laa gi siia olaadeu ingoo ma olaadeu atangada. Gai au ne gidee dahi beebaa e daohi ai ingoo o dangada, ne aahe mai laa gi de henua i taamada, gai au ne gidee mee ne sisi i ono lodo:

<sup>6</sup> Aanei de gau de henua a Nebuchadnezzar, de hoolooligi o Babylon, ne kave laa gi Babylon. (Gilaadeu ne aahe mai gi Jerusalem ma Judah, dahi ma dahi ne ahe ga hano gi dono aduhale donu;

<sup>7</sup> gilaadeu ne loomai madali Zerubbabel, ma Jeshua, ma Nehemiah, ma Azariah, ma Raamiah, ma Nahamani, ma Mordecai, ma Bilshan, ma Mispereth, ma Bigvai, ma Nehum, aama Baanah).

Aanei ingoo o de gau Israel ne daohi:

<sup>8</sup> de hagadiilinga o Parosh se
<sup>9</sup> de hagadiilinga o Shephatiah se
<sup>10</sup> de hagadiilinga o Arah se
<sup>11</sup> de hagadiilinga o Pahath-Moab, go dangada i huaabodu o J
<sup>12</sup> de hagadiilinga o Elam se
<sup>13</sup> de hagadiilinga o Zattu se
<sup>14</sup> de hagadiilinga o Zaccai se
<sup>15</sup> de hagadiilinga o Binnui se
<sup>16</sup> de hagadiilinga o Bebai se
<sup>17</sup> de hagadiilingaa o Azgad se
<sup>18</sup> de hagadiilinga o Adonikam se
<sup>19</sup> de hagadiilinga o Bigvai se
<sup>20</sup> de hagadiilinga o Adin se
<sup>21</sup> de hagadiilinga o Ater (mai i Hezekiah) se
<sup>22</sup> de hagadiilinga o Hashum se
<sup>23</sup> de hagadiilinga o Bezai se
<sup>24</sup> de hagadiilinga o Hariph se
<sup>25</sup> de hagadiilinga o Gibeon se

26	dangada o Bethlehem ma Netophah se
27	dangada o Anathoth se
28	dangada o Beth Azmaveth se
29	dangada o Kiriath Jearim, ma Kephirah, aama Beeroth se
30	dangada o Ramah ma Geba se
31	dangada o Mikmash se
32	dangada o Bethel ma Ai se
33	dangada o Nebo ange laa se
34	dangada o Elam ange laa se
35	dangada o Harim se
36	dangada o Jericho se
37	dangada o Lod, ma Hadid aama Ono se
38	dangada o Senaah se

39 De gau haimeedabu:

	de hagadiilinga o Jedaiah, mai i de huaabodu o Jeshua, se	97
40	de hagadiilinga o Immer se	1,
41	de hagadiilinga o Pashhur se	1,
42	de hagadiilinga o Harim se	1,

43 De aamuli o Levi:

	de hagadiilinga o Jeshua, (mai i Kadmiel ma Hodaviah) se	7
--	--	---

44 De gau daahili:

de hagadiilinga o Asaph se	148
----------------------------	-----



45 De gau hagaloosi haitoga:

de hagadiilinga o Shallum, ma Ater, ma Talmon, ma Akkub, m

46 De gau e hai hegau o de hale daumaha:  
go hagadiilinga o Ziha, ma Hasupha, ma Tab-  
baath,

47 ma Keros, ma Sia, ma Padon,

48 ma Lebana, ma Hagaba, ma Shalmal,

49 ma Hanan, ma Giddel, ma Gahar,

50 ma Reiah, ma Rezin, ma Nekoda,

51 ma Gazzam, ma Uzza, ma Paseah,

52 ma Besai, ma Meunim, ma Nephussim,

53 ma Bakbuk, ma Hakupha, ma Harhur,

54 ma Bazlith, ma Mehida, ma Harsha,

55 ma Barkos, ma Sisera, ma Temah,

56 ma Nezhiah, aama Hatipha.

57 Hagadiilinga o de gau hai hegau o Solomon:  
go dana a Sotai, ma Sophereth, ma Perida,

58 ma Jaala, ma Darkon, ma Giddel,

59 ma Shephatiah, ma Hattil,

ma Pokereth-Hazzebaim, aama Amon.

60 Gai de gau hai hegau o de hale daumaha ma hagadiilinga o

61 Gai aanei dangada mai i Tel Melah, ma Tel Har-  
sha, ma Kerub, ma Addon, aama Immer, aagai gi-  
laadeu tee maua i de hai gi too donu bolo olaadeu  
dubuna madagidagi ma olaadeu hagadiilinga ni  
dangada Israel donu:

62 go hagadiilinga o Delaiah, ma Tobiah, aama Nekoda se	64
---	----

63 Gai mai i de gau haimeedabu:

go de hagadiilinga o Hobaiah, ma Hakkoz, ma Barzillai (go taane ne hai bodu ange laa gi dahi damaa hine a Barzillai, taane Gilead, gai ia ne kave de ingoo o dono saulaba).

64 De gau nei ne ssala olaadeu ingoo i lodo beebaa e sisi ai laa ingoo, gai tee gidee e gilaadeu; deelaai ai, gilaadeu gu dee gilimalali ma tee dau madali de gau haimeedabu.

65 Gai de goobenaa ne hai ange gilaadeu gi dee gaina gai dabu, ga dae ai gi de dahi dangada haimeedabu e hagamodu ina mee nei i de *Urim* ma de *Thummim*.\*

66 Taelodo o dangada alodahi se 42,360,

67 gai olaadeu daane ma haahine hai hegau se 7,337; olaadeu daane ma haahine daahili se 245.

68 Alaadeu hoosa se 736, alaadeu *mule* se 245.\*

69 Alaadeu gamelo se 435, alaadeu *donkey* se 6,720.

70 Gai hanu dagi o denga hagadiilinga ne daohi age hanu mee e hai ai de hegau. De goobenaa ne daohi age e mano *daric*† goolo, e madalima boolo, ma e matolu malo ange gi de gau haimeedabu, aama e limalau *mina*‡ selevaa.

---

\* **7:65** Exo 28.30; Deut 33.8      \* **7:68** Hanu beebaa Hebrew ange laa e dee dagodo ai de gubu nei.      † **7:70** 1,000 *darice* bei se 19 pauni.      ‡ **7:70** 500 *minae* bei se 625 pauni.

<sup>71</sup> Gai hanu dagi o denga hagadiilinga ne daohi age e luasemada *daric*§ goolo, ma e 2,200 *mina*\* selevaa.

<sup>72</sup> Gai dangada ange laa ne daohi age e luasemada *daric* goolo, ma e luamano *mina*† selevaa, aama e madaono ma hidu malo ange gi de gau haimeedabu.

<sup>73</sup> Gai de gau haimeedabu, ma de aamuli o Levi, ma de gau hagaloosi haitoga, ma de gau daahili, ma hanu mai i magavaa o dangada, ma de gau e haia hegau i de hale daumaha, ma de gau Israel alodahi ne hulo ga nnoho i olaadeu aduhale donu.\*

Gai ga dae mai huu de hidu malama, gai de gau Israel gu nnoho i olaadeu aduhale donu.

## 8

### *De dau a Ezra denga hainga*

<sup>1</sup> Gai dangada alodahi ne hagabuni bei dagodo o dahi dangada donu huu, gilaadeu ne loomai gi lo te duu malaetae i ma te Haitoga o Vai. Gai gilaadeu ne hai ange gi Ezra, tangada sisi, gi gaamai de beebaa o de hainga a Moses, go muna a TAGI MAOLUNGA ange gi de gau Israel.

<sup>2</sup> Gai tangada haimeedabu go Ezra ne gaamai de beebaa o de hainga, gi mada i mua o de hagabuulingaa daane ma haahine, aama dangada alodahi e maua laa i de hagalongo ga tonu ange aagena, i tahi laangi o de hidu malama.

§ 7:71 20,000 *darice* bei se 375 pauni (diiloo hogi de gubu e 72).

\* 7:71 2,200 *minae* bei se 1½ dana. † 7:72 2,000 *minae* bei se 1¼ dana. \* 7:73 1 Ch 9.2; Neh 11.3

<sup>3</sup> Gai ia ne dau ange denga hainga gi denga daane ma haahine, ma dangada alodahi gu maua laa i de tonu ange, i tuu malaetae i ma te Haitoga o denga Vai, mai i taiao ga dae ai gi de madohi lua de laangi. Gai dangada alodahi ne kana ange ga hagallongo muna o de beebaa o de hainga.

<sup>4</sup> Gai Ezra tangada sisi ne duu i hongaga de hada laagau alaadeu gu hagadabena laa. Gai Mattithiah, ma Shema, ma Ananiah, ma Uriah, ma Hilkiyah, aama Maaseiah e tuu madali ia i dono baasi madau, gai Pedaiah, ma Mishael, ma Malkijah, ma Hashum, ma Hashbaddanah, ma Zechariah, aama Meshullam e tuu i dono baasi masui.

<sup>5</sup> Gai Ezra ga hhuge de beebaa i madamada o dangada alodahi, go hiidinga ia e duu i de mommee e maolunga ange i dangada alodahi; gai de masavaa huu aana ne hhuge ai de beebaa laa, gai dangada alodahi ga tuu age.

<sup>6</sup> Gai Ezra ne tuhi TAGI MAOLUNGA de Maadua maolunga, gai dangada alodahi ne haalo olaadeu lima gi lo te moana, ga hagataba, “Amen! Amen!” Gai gilaadeu ne ino gi hongaga de gelegele ga daumaha ange gi TAGI MAOLUNGA.

<sup>7</sup> Gai hanu daane de aamuli o Levi – go Jeshua, ma Bani, ma Sherebiah, ma Jamin, ma Akkub, ma Shabbethai, ma Hodiah, ma Maaseiah, ma Kelita, ma Azariah, ma Jozabad, ma Hanan, aama Pelaiah – ga hagadonu ange de hainga gi dangada i de masavaa olaadeu e tuu ai i kilaa.

<sup>8</sup> Gilaadeu ne dau muna i de Beebaa o Hainga a de Maadua, ga hagadonu ange gi dangada, ma de tala ange de hagadoonunga gi tonu ange ai

dangada gi alaadeu muna gu dau.

<sup>9</sup> Gai Nehemiah, de goobena, ma Ezra, tangada haimeedabu ma ssisi, ma denga daane de aamuli o Levi ne agoago ina ange laa dangada, ga hai ange gi dangada alodahi, “Anailaa nei se laangi e dabu ange gi TAGI MAOLUNGA doodou Maadua; goodou aude llodo baubau aabe gi tangi.” Go hiidinga dangada alodahi gu tangi i de masavaa alaadeu ne langona ai muna o de hainga.

<sup>10</sup> Gai ia ne hai ange gi gilaadeu, “Goodou hulo gaina gai moomuna ma de unu uvaini maimai, ma de duha ange gai gi gilaadeu tigi ai alaadeu mee gu hagadabena, go hiidinga anailaa nei se laangi e dabu ange gi taadeu Ia Aamua. Goodou aude llodo baubau, go hiidinga de malangilangi o TAGI MAOLUNGA e hagammahi goodou.”

<sup>11</sup> Gai de aamuli o Levi ne hai gi dee hagalongaa dangada alodahi, ga hai ange, “Goodou aude hagalongaa, go hiidinga ailaa nei se laangi dabu; goodou aude daemaha oodou lodo.”

<sup>12</sup> Deelaa ai, dangada alodahi ne aahe ga gaimee ma de unu aama de duha ange gai gi dangada; gu kona mmao de malangilangi, go hiidinga gilaadeu gu tonu ange gi muna ne tala ange gi gilaadeu.

*De hai Taonga o denga Baasi Hale*

<sup>13</sup> Gai de hagalu laangi huu gai gu hagabuni mai denga dagi o denga hagadiilinga alodahi, ma de gau haimeedabu, aama denga daane de aamuli o Levi gi daho tangada sisi go Ezra, e agoago ai gilaadeu i muna o de hainga.

<sup>14</sup> Gai gilaadeu gu gidee e sisi i de hainga, go mee a TAGI MAOLUNGA ne tala ange i daho Moses, bolo de

gau Israel gi nnoho i lodo baasi hale i de masavaa o taonga i de hidu malama,\*

<sup>15</sup> gai gilaadeu gi hagailoo ina ma de hagadele i lodo aduhale alodahi aama Jerusalem, “Goodou hulo gi ulu mounga gaamai ai laa manu lau kohu o denga *olive*, ma de *pine*, ma de *myrtle*, ma de *palm*, e hai ai denga baasi hale, bei de hai gu sisi ai laa.”

<sup>16</sup> Gai dangada ne hulo ga gaamai denga laa manu, e hagatuu ai olaadeu baasi hale i tua denga hale, ma lodo olaadeu buibui, aama lo te buibui de hale o de Maadua, ma lo te duu malaetae i gaogao de Haitoga o denga Vai, aama lo te duu malaetae i gaogao de Haitoga o Ephraim.

<sup>17</sup> Gai de hagabuulingaa dangada alodahi ne aahe mai laa i dua delaadeu gaavee gee i de henua, ne hai denga baasi hale ga nnoho ai, go hiidinga se hegau tigi hai mai loo i de masavaa o Joshua tama daane a Nun ga dae mai ai gi de laangi laa. Gai dangada alodahi gu malangilangi mmao.

<sup>18</sup> Gai Ezra ga dau de beebaa o de hainga a de Maadua i denga laangi laa, mai i tahi laangi ga dae ai gi de laangi hagaodi. Gai gilaadeu ne dao taonga nei i e hidu laangi, gai de valu laangi se laangi e hagabuni ai ga daumaha.

## 9

### *De tala a de gau Israel olaadeu haisala*

<sup>1</sup> Gai de madalua ma haa huu laangi o de malama mau, gai de gau Israel ga hagabuni ga hagahiikai, ma de kahu i malo daladala, aama de gaavange lehu gi hongga olaadeu biho.

---

\* **8:14** Lev 23.33-36, 39-43; Deut 16.13-15

<sup>2</sup> Gai de gau Israel ne vvae gee gilaadeu mai i de gau henua gee alodahi, ga tuu ga tala olaadeu haisala aama baubau o olaadeu dubuna madagidagi.

<sup>3</sup> Gai gilaadeu ne tuu i olaadeu mommee i e dolu aaaa ga dau de Beebaa o hainga a TAGI MAOLUNGA, delaadeu Maadua, gai gilaadeu ne tala olaadeu haisala ma de daumaha ange gi TAGI MAOLUNGA, delaadeu Maadua i e dolu aaaa.

<sup>4</sup> Gai denga daane de aamuli o Levi e tuu i hongga de gaagenga: go Jeshua, ma Bani, Kadmiel, Shebaniah, Bunni, Sherebiah, ma Bani, ma Kenani, gai gilaadeu ne hevaalogi ga tangi ange gi TAGI MAOLUNGA delaadeu Maadua.

<sup>5</sup> Gai denga daane de aamuli o Levi, go Jeshua, ma Kadmiel, ma Bani, ma Hashabneiah, ma Sherebiah, ma Hodiah, ma Shebaniah, ma Pethahiah, ne hai ange, “Goodou tuu age duuhia TAGI MAOLUNGA doodou Maadua, go de ia e deai sono daamada aabe se hagaodi! Alodahi gi duuhia doo ingoo mahamaha, go de ingoo e maolunga ange i de hagadegi aama tuhi alodahi.

<sup>6</sup> Go koe donu huu go TAGI MAOLUNGA. Go koe ne haia denga langi, ma de langi maolunga hugadoo, ma denga hagabuulinga iai, ma henua i lalo ma mee alodahi iai, ma denga dai ma mee alodahi iai. Go koe e gaavange gi gilaadeu alodahi de mouli, gai mee o de langi e ino adu gi de goe.

<sup>7</sup> Go koe go Iahweh, de Maadua ne hilia Abram ga hagasao mai ia i Ur o de gau Babylon, ga hagaingoo ange ia go Abraham.\*

<sup>8</sup> Gai koe ne gidee bolo ia e hai hegau i de

---

\* 9:7 Gen 11.31; 12.1; 17.5

muna abodonu, gai koe ne hai dahi hagatoo donu hagaheloongoi madali ia, bolo koe e gaavange gi dono aamuli de henua o de gau Canaan, ma de gau Heth, ma de gau Amor, ma de gau Perez, ma de gau Jebus, aama de gau Girgash. Koe ne hagasula dau hagatoo donu, go hiidinga koe e heohi.\*

<sup>9</sup> Koe ne gidee de hagaduasala ina omaadeu dubuna madagidagi i Egypt, ma de langona de-laadeu tangi adu i gaogao Tai Mmea.\*

<sup>10</sup> Gai koe ne hai denga sauua ma mee hagalele mouli ga hai baasi ange ai gi Pharaoh, ma ono dangada hai hegau alodahi, aama dangada alodahi o dono henua, go hiidinga koe ne iloo bolo gilaadeu ne hai hegau hagamaolunga ange gi omaadeu dubuna madagidagi. Koe ne hai ga dele longo o doo ingoo ga dae mai ai gi anailaa nei.\*

<sup>11</sup> Koe ne vvae de vai i olaadeu mada i mua, gai gilaadeu ga hulo laa lo te vai i hongga de gelegele mmasa; aagai koe ne maga dangada ne dolohia gilaadeu gi lodo mommee gelo, bei dagodo o de hadu i lo te dai mmahi.\*

<sup>12</sup> Gai koe ne dagi gilaadeu i tuludulu ha-gausinga i de laangi, gai de boo i tuludulu ahi e hagamaalama ai de haiava olaadeu e hulo ai.\*

<sup>13</sup> Koe ne hano iho gi de mounnga go Sinai, ga basa ange gi gilaadeu mai i de langi ga gaavange gi gilaadeu au hagamodu ssoe, ma au hainga heohi, ma au mee gu hagasauua aama au muna danuaa gu tala mai.\*

---

\* **9:8** Gen 15.18-21      \* **9:9** Exo 3.7; 14.10-12      \* **9:10** Exo 7.8–12.32  
 \* **9:11** Exo 14.21-29; 15.4-5      \* **9:12** Exo 13.21-22  
 \* **9:13** Exo 19.18–23.33



14 Koe ne hai gi iloo e gilaadeu dau Sabbath dabu, ma de gaavange gi gilaadeu au muna, ma au mee gu hagasauaa, ma au hainga mai i daho doo dangada hai hegau go Moses.

15 Koe ne gaavange gi gilaadeu pelaoaa mai i de langi i delaadeu hiikai, ma vai mai i lo te hadu i delaadeu hieunu, gai koe ne hai ange gilaadeu gi hulo gi gaavee de henua aau gu hagatoo donu ange gi gilaadeu.\*

16 Aagai gilaadeu, omaadeu dubuna madagidagi, ne hagamaolunga ma de hagamakaga olaadeu lodo, gilaadeu tee hagallongo au muna.\*

17 Gilaadeu tee llodo e hagallongo adu, gai tee hagamaanadu i denga hegau hagalele mouli aau ne hai i olaadeu daha, aagai ne hagamakaga olaadeu lodo ga hili dahi dagi e aahe ai gi de mommee olaadeu ne hagahai hegau ina ai i Egypt. Aagai koe se Maadua e degi, ma de abodonu aama de lodo aloha mmao, e dee moolau de lili gai e honu i de aloha; koe tee tili donu gilaadeu.\*

18 Gai de masavaa alaadeu ne hagavaivai ai denga baalanga e hai ai dahi kaau, gai ne hagataba, 'Deenei doodou Maadua ne hagassao ina mai goodou i Egypt,' gai gilaadeu ne hagamangi mee donu goe,\*

19 gai koe tee tili donu gilaadeu i de vao, i hiidinga doo lodo aloha. Gai tuludulu hagamangi ne dagina laa gilaadeu tee hano gee donu i olaadeu daha i de laangi, gai tuludulu o de ahi ne

\* 9:15 Exo 16.4-15; 17.1-7; Deut 1.21  
1.26-33 \* 9:17 Exo 34.6; Num 14.18

\* 9:16 Num 14.1-4; Deut  
\* 9:18 Exo 32.1-4

hagamaalama delaadeu haiava i de boo tee hano gee hogi.\*

<sup>20</sup> Gai koe ne gaavange doo Hagasaalunga danuaa ga agoago ange ai gilaadeu, koe tee kave gee au manna e haangai ange ai laa gilaadeu, ma de gaavange gi gilaadeu alaadeu vai e unu ai.

<sup>21</sup> Gai koe ne tilo ange gilaadeu i de vao i e madahaa ngadau, teai se mee daudahi olaadeu ne duasala ai. Olaadeu malo tee maua donu gi duai, olaadeu vae tee hhua hogi.

<sup>22</sup> Koe ne gaavange gi gilaadeu denga nohoanga hodoologi ma huaahenua, ma de vaevae ange gi gilaadeu denga dege alodahi. Gilaadeu ne kave de henua o Sihon, de hodoologi o Heshbon, ma de henua o Og, de hodoologi o Bashan.\*

<sup>23</sup> Gai koe ne hai gilaadeu gi hagadili gi soa bei de lagolago o denga heduu i lo te langi, gai koe ne kave gilaadeu ga tae gi de henua aau ne hai ange gi olaadeu dubuna madagidagi gilaadeu gi hulo gi henua ai.\*

<sup>24</sup> Gai olaadeu hagadiilinga ne hulo ga kave de henua laa. Gai koe ne dugu ange gilaadeu gi hagadee kii ina dangada nogo nnoho i de henua laa, go de gau Canaan, ga hai gilaadeu ma olaadeu hodoologi, aama denga huaadangada o de henua laa gi hai hegau ange gi gilaadeu, ma de hai be ni aha alaadeu e llodo e hai ange gi gilaadeu.\*

<sup>25</sup> Gilaadeu ne kave denga aduhale buibui, ma gelegele danuaa, ma denga hale e hoohonu i denga hagadaangaa mee danuaa alodahi, ma

---

\* **9:19** Deut 8.2-4    \* **9:22** Num 21.21-35    \* **9:23** Gen 15.5; 22.17;

Josh 3.14-17    \* **9:24** Josh 11.23

vai gu hoda gi lo te baba, ma denga veelengaa *grape*, ma denga veelengaa *olive*, ma manu iai hua lagolago. Deelaa ai, gilaadeu ne gaimee ga boobosu ma de pedi, aama de malangilangi i doo abodonu laumalie.\*

<sup>26</sup> Aagai gilaadeu tee hagallongo i au muna ma de hai baasi adu gi de goe. Gilaadeu ne daahuli gee i au hainga ma de daa ga maakau oo pelaabisi, go gilaadeu ne agoagona gilaadeu gi aahe mai ai gilaadeu gi de goe. Gai ne kona mmao delaadeu hagangadi mee goe.\*

<sup>27</sup> Gai koe ne dugu ange olaadeu hagadaumee gi hagaduasala ina gilaadeu. Aagai de masavaa huu olaadeu ne duasala ai, ga tangi adu gi de goe, gai koe ne langona mai i de langi, gai go hiidinga o doo lodo aloha laumalie, gai koe ne gaavange gi gilaadeu hanu dangada gi hagaola ina gilaadeu mai i ssauaa o olaadeu hagadaumee.

<sup>28</sup> Aagai de masavaa huu olaadeu ne nnoho paba ai, gai gilaadeu ga aahe ange ga hai de baubau i mada luoo mada; gai koe ga tili ange gilaadeu gi olaadeu hagadaumee gi hagadee kii ina, gai gilaadeu gu nnoho i lalo olaadeu hagadaumee. Gai de masavaa huu olaadeu ne daahuli mai ai ga tangi adu gi de goe, gai koe gu langona delaadeu tangi mai i de langi. Gai ne lagolago hanonga aau ne hagaola ai gilaadeu, i hiidinga doo lodo aloha.

<sup>29</sup> Koe ne hagakana ange gilaadeu, gi aahe mai ai gilaadeu gi daudali i dau hainga, aagai gilaadeu ne hagamaolunga ma tee daudali i au muna. Gilaadeu ne hagahaisala au mee gu hagasauaa, go

---

\* 9:25 Deut 6.10-11      \* 9:26 Jdg 2.11-16

mee o tangada e mouli ai noo ia e daudali ai. Gilaadeu ne huuhuli gee i de goe ma de makaga olaadeu lodo, gilaadeu tee hagallongo adu.\*

<sup>30</sup> Gai koe ne golomagi oo lodo i gilaadeu i hanu ngadau lagolago, aama de hagasee gilaadeu i doo Hagasaalunga i daho oo pelaabisi. Aagai gilaadeu tee anga adu gi au muna. Deelaa ai, koe ne dugu ange dangada o denga henua ange laa gi hagadee kii ina gilaadeu.\*

<sup>31</sup> Gai go hiidinga doo lodo aloha laumalie koe tee hagalilo gilaadeu aabe ne tili gilaadeu, go hiidinga koe se Maadua abodonu ma de lodo aloha.

<sup>32</sup> Deenei ai, demaadeu Maadua, go de Maadua maolunga ma de mmahi aama de hagamadagu, go de ia e daohia de hagatoo donu hagaheloongi o dono lodo aloha, koe gi dee hagangadi mee ina denga hai ngadaa alodahi gu paa nei i gimaadeu, ma omaadeu hodoologi, ma omaadeu dagi, ma omaadeu dangada haimeedabu, ma omaadeu pelaabisi, ma omaadeu maadua aama oo dangada alodahi, mai i de masavaa o denga hodoologi o Assyria ga dae mai ai gi anailaa nei.\*

<sup>33</sup> Gai koe e heohi donu i dau dugu ange mee nei alodahi gi hai mai gi gimaadeu, go hiidinga koe ne hai hegau i de mee abodonu, aagai gimaadeu ne hai de baubau.

<sup>34</sup> Omaadeu hodoologi, ma omaadeu dagi, ma omaadeu dangada haimeedabu, ma omaadeu dubuna madagidagi tee daudali i au hainga aabe ne daohi au muna, aama au muna ne hagakana

---

\* **9:29** Lev 18.5    \* **9:30** 2 Ki 17.13-18; 2 Ch 36.15-16    \* **9:32** 2 Ki 15.19, 29; 17.3-6; Ezra 4.2, 10

ange ai gilaadeu.

<sup>35</sup> Gilaadeu tee daumaha adu hogi gi de goe aabe ne daahuli gee i alaadeu hegau baubau, i de masavaa o olaadeu nohoanga hodoologi, ma de masavaa aau ne hai ai gilaadeu gi nnoho paba i doo abodonu laumalie i dahi henua laumalie ma de danuaa de gelegele iai.

<sup>36</sup> Tilo, anailaa nei gai gimaadeu gu ni dangada hai hegau, i hongga de henua aau ne gaavange gi omaadeu dubuna madagidagi, gi maua ai e gilaadeu i de gai denga huamanu aama mee danuaa e ssomo ai. Uaa, gimaadeu gu ni dangada hai hegau.

<sup>37</sup> Gai hua manu lagolago o de gelegele gu gaavange gi denga hodoologi aau gu hai gi dagina gimaadeu, i hiidinga omaadeu haisala; go gilaadeu hogi e huahua i omaadeu angaanga ma de hai olaadeu mee e llodo ai i amaadeu manu haangai, gai gimaadeu gu duasala mmao.

*De hagatoo donu e daohi de hainga*

<sup>38</sup> “Gai go hiidinga o mee nei alodahi, gimaadeu e hai dahi hagatoo donu, ga sisi ga daohi, gai omaadeu dagi, ma dangada de aamuli o Levi, aama omaadeu dangada haimeedabu ga hagasauaa i olaadeu hagailonga.”

## 10

<sup>1</sup> Aanei dangada ne hagasauaa ina ma de ssaini olaadeu ingoo:

de goobena go Nehemiah, tama daane a Hacialiah,  
ma Zedekiah,

<sup>2</sup> ma Seraiah, ma Azariah, ma Jeremiah,

<sup>3</sup> ma Pashhur, ma Amariah, ma Malkijah,  
<sup>4</sup> ma Hattush, ma Shebaniah, ma Malluk,  
<sup>5</sup> ma Harim, ma Meremoth, ma Obadiah,  
<sup>6</sup> ma Daniel, ma Ginnethon, ma Baruch,  
<sup>7</sup> ma Meshullam, ma Abijah, ma Mijamin,  
<sup>8</sup> ma Maaziah, ma Bilgai, aama Shemaiah.  
Aanei de gau haimeedabu.

<sup>9</sup> Hagadiilinga o Levi:  
go Jeshua, tama daane a Azaniah, ma Binnui  
tama daane a Henadad, ma Kadmiel,  
<sup>10</sup> ma olaadeu dangada ange laa: go Shebaniah,  
ma Hodiah, ma Kelita, ma Pelaiiah, ma Hanan,  
<sup>11</sup> ma Mica, ma Rehob, ma Hashabiah,  
<sup>12</sup> ma Zaccur, ma Sherebiah, ma Shebaniah,  
<sup>13</sup> ma Hodiah, ma Bani, aama Beninu.

<sup>14</sup> Denga dagi o dangada:  
go Parosh, ma Pahath-Moab, ma Elam, ma  
Zattu, ma Bani,  
<sup>15</sup> ma Bunni, ma Azgad, ma Bebai,  
<sup>16</sup> ma Adonijah, ma Bigvai, ma Adin,  
<sup>17</sup> ma Ater, ma Hezekiah, ma Azzur,  
<sup>18</sup> ma Hodiah, ma Hashum, ma Bezai,  
<sup>19</sup> ma Hariph, ma Anathoth, ma Nebai,  
<sup>20</sup> ma Magpiash, ma Meshullam, ma Hezir,  
<sup>21</sup> ma Meshezabel, ma Zadok, ma Jaddua,  
<sup>22</sup> ma Pelatiah, ma Hanan, ma Anaiiah,  
<sup>23</sup> ma Hoshea, ma Hananiah, ma Hasshub,  
<sup>24</sup> ma Hallohesh, ma Pilha, ma Shobek,  
<sup>25</sup> ma Rehum, ma Hashabnah, ma Maaseiah,  
<sup>26</sup> ma Ahiah, ma Hanan, ma Anan,  
<sup>27</sup> ma Malluk, ma Harim, aama Baanah.

28 Gai dangada ange laa – go de gau haimeedabu, ma dangada de aamuli o Levi, ma de gau haga-loosi haitoga, ma de gau daahili, ma de gau hai hegau i de *temple*, aama dangada alodahi gu vvae gee gilaadeu mai i dangada o de henua e daudali ange i hainga a de Maadua, madali olaadeu bodu, ma alaadeu dama daane, ma damaa hine, aama dangada alodahi e iloo ma de tonu ange –

29 gilaadeu nei alodahi ne hagabuni madali olaadeu dangada aamua ga hai dahi hagamalaia ma de hagatoo donu bolo gilaadeu ga daudali i hainga a de Maadua gu gaavange laa gi gilaadeu mai i daho Moses, tangada hai hegau o de Maadua, gai gilaadeu gi daohia ga hai hegau i hainga alodahi a TAGI MAOLUNGA taadeu Ia Aamua, ma ana hagamodu, aama ana mee gu hagasauaa:

30 “Gimaadeu e dee gaavange amaadeu damaa hine gi dangada o de henua nei, aabe kave alaadeu damaa hine gi hai bodu ange gi amaadeu dama daane.\*

31 Gai noo dangada i de henua e gaamai olaadeu goloa aabe denga *grain* e hagao i de laangi o Sabbath aabe go dahi laangi dabu, gai gimaadeu e dee hagao alaadeu mee. Gimaadeu e dee hagihagi hogi huamanu i hongga omaadeu gelegele i denga hidu ngadau alodahi, ma de degi ange gi muli alodahi.\*

32 Gai gimaadeu ne hagamodu i omaadeu daha e gaavange dahi diba i diba e dolu o dahi *shekel*.\*

---

\* **10:30** Exo 34.16; Deut 7.3      \* **10:31** Exo 23.10-11; Lev 25.1-7; Deut 15.1-2      \* **10:32**  $\frac{1}{3}$  *shekele* bei se  $\frac{1}{4}$  *ounce*.

i ngadau alodahi e hai ai hegau o de hale o demaadeu Maadua:\*

<sup>33</sup> ange gi denga pelaoaa o ssigidaumaha, ma sigidaumaha o hua *grain*, ma denga sigidaumaha dudu i laangi alodahi, ma denga Sabbath, ma denga daonga i de duu de maasina i dai, ma denga daonga gu hagailonga, ma denga goloa dabu, ma sigidaumaha o haisala o de gau Israel, aama hegau alodahi o de hale o demaadeu Maadua.

<sup>34</sup> Gai gimaadeu de gau haimeedabu, ma de aamuli o Levi, aama dangada ne hai tada e hili ai denga huaabodu e gaamai lahhie gi de hale o demaadeu Maadua, i de masavaa gu hagailonga i ngadau alodahi, e dudu i hongaga de mommee o ssigidaumaha a TAGI MAOLUNGA taadeu Maadua, bei de hai gu sisi ai i de hainga.

<sup>35</sup> Gimaadeu ne hagamodu hogi bolo gimaadeu e gaamai denga hua i taamada i hongaga omaadeu gelegele, aama hua o denga manu alodahi gi de hale o TAGI MAOLUNGA i ngadau alodahi.\*

<sup>36</sup> Gimaadeu e gaamai hogi gi de hale o demaadeu Maadua, amaadeu dama daane maatua ma tama e haanau i taamada i daho amaadeu manu haangai, ma amaadeu kaau ma amaadeu ssiibi, e gaavange gi de gau haimeedabu e haia hegau i kilaa, bei de hai gu sisi ai i de hainga.\*

<sup>37</sup> Gai gimaadeu e gaamai hogi gi lodo mommee doange o de hale o demaadeu Maadua, ga gaavange gi de gau haimeedabu, tahi laabunga o amaadeu pelaoaa lligi ma amaadeu *grain* e sigidaumaha, aama hua i taamada o amaadeu

---

\* **10:32** Exo 30.11-16

\* **10:35** Exo 23.19; 34.26; Deut 26.2

\* **10:36** Exo 13.2



manu alodahi, ma amaadeu uvaini houu, aama lolo. Gai gimaadeu e daohi age hogi dahi diba i diba e madaangahulu o hua i hongu omaadeu gelegele gi de aamuli o Levi, i hiidinga go gilaadeu e hagabudulia dahi diba i diba e madaangahulu i aduhale alodahi omaadeu e hai hegau ai.\*

<sup>38</sup> Gai dahi dangada haimeedabu, mai i de aamuli o Aaron, gi noho madali de aamuli o Levi i de masavaa alaadeu e kave ai dahi diba i diba e madaangahulu, gai de aamuli o Levi gi vaaea dahi diba i diba e madaangahulu o dahi diba i diba e madaangahulu alaadeu ne kave laa, gi gaamai gi lodo mommee doange i de hale o demaadeu Maadua.\*

<sup>39</sup> Gai de gau Israel ma de aamuli o Levi gi gaamai denga *grain* alaadeu e daohia age laa, ma uvaini houu, ma lolo gi denga mommee e doange ai laa goloa o de mommee dabu, go de mommee o de gau haimeedabu e hai hegau ai laa, ma de gau hagaloosi haitoga, aama de gau daahili e nnoho ai laa hogi.

Gai gimaadeu e dee tili naa donu de hale o demaadeu Maadua.”

## 11

### *Dangada ne nnoho i Jerusalem*

<sup>1</sup> Gai dagi o dangada ne nnoho laa i Jerusalem, gai de gau Israel ange laa ne dada denga laagau ga hilihili ai e dagidahi mai i e madaangahulu dangada gi nnoho i Jerusalem, de aduhale dabu, gai de gau ange laa gi nnoho i olaadeu aduhale.

---

\* **10:37** Num 18.21      \* **10:38** Num 18.26

<sup>2</sup> Gai dangada ne tuhi gilaadeu alodahi ne malangilangi laa i de nnoho i Jerusalem.

<sup>3</sup> Gai aanei dagi o denga vaaenga ne nnoho i Jerusalem (gai hanu dangada Israel, ma hanu gau haimeedabu, ma hanu i de aamuli o Levi, ma hanu dangada hai hegau o de hale daumaha, aama aamuli o de gau hai hegau o Solomon ne nnoho i hanu aduhale o Judah, dahi ma dahi ne nnoho i hongga dono gelegele i olaadeu aduhale,\*)

<sup>4</sup> gai e hanu dangada o Judah ma Benjamin ne nnoho i Jerusalem):

Dangada mai i de aamuli o Judah: go Athaiah tama daane a Uzziah, tama daane a Zechariah, tama daane a Amariah, tama daane a Shephatiah, tama daane a Mahalalel, mai i de hagadiilinga o Perez;

<sup>5</sup> ma Maaseiah tama daane a Baruch, tama daane a Col-Hozeh, tama daane a Hazaiiah, tama daane a Adaiiah, tama daane a Joiarib, tama daane a Zechariah, mai i de hagadiilinga o Shilon.\*

<sup>6</sup> De hagadiilinga alodahi o Perez ne nnoho laa i Jerusalem se 468 daane dau iai.

<sup>7</sup> Gai dangada mai i de aamuli o Benjamin: go Sallu tama daane a Meshullam, tama daane a Joed, tama daane a Pedaiah, tama daane a Koliaiah, tama daane a Maaseiah, tama daane a Ithiel, tama daane a Jeshaiiah,

<sup>8</sup> gai ono dua go Gabbai ma Sallai, se 928 olaadeu dangada.

<sup>9</sup> Gai delaadeu dagi go Joel tama daane a Zicri, gai Judah tama daane a Hassenuah go togolua

---

\* **11:3** Neh 7.73      \* **11:5** *Shilon*, aabe go *Shelah*.

dagi o de aduhale.

<sup>10</sup> De gau haimeedabu: go Jedaiah tama daane a Joiarib, ma Jakin,

<sup>11</sup> ma Seraiah, tama daane a Hilkiah, tama daane a Meshullam, tama daane a Zadok, tama daane a Meraioth, tama daane a Ahitub, tagi o de hale o de Maadua,

<sup>12</sup> madali olaadeu daina e haia hegau o de hale daumaha, se 822; go Adaiah, tama daane a Jeroham, tama daane a Pelaliah, tama daane a Amzi, tama daane a Zechariah, tama daane a Pashhur, tama daane a Malkijah,

<sup>13</sup> gai ono daina, go dagi o denga huaabodu – se 242 gilaadeu; go Amashsai, tama daane a Azarel, tama daane a Ahzai, tama daane a Meshillemoth, tama daane a Immer,

<sup>14</sup> gai olaadeu daina daane, ni daane mmahi i de hebagi, se 128. Gai delaadeu dagi go Zabdiel, tama daane a Haggedolim.

<sup>15</sup> Gai mai i daane de aamuli o Levi: go She-maiah, tama daane a Hasshub, tama daane a Azrikam, tama daane a Hashabiah, tama daane a Bunni;

<sup>16</sup> gai Shabbethai ma Jozabad, ni dagi niio de aamuli o Levi, go gilaadeu e dagina hegau laa daha o de hale o de Maadua;

<sup>17</sup> ma Mattaniah, tama daane a Micah, tama daane a Zabdi, tama daane a Asaph, go tagi e damadaa ina de hagahe ange de abodonu i de masavaa o talodalo, ma Bakbukiah go togolua i magavaa ono daina daane, ma Abda tama daane a Shammua, tama daane a Galal, tama daane a Jeduthun.

18 Gai dangada i de aamuli o Levi e nnoho i de aduhale dabu se 184.

19 Gai de gau hagaloosi haitoga: go Akkub, ma Talmon, ma olaau dangada, go dangada e diiloo ange denga haitoga – se 172 daane.

20 Gai de gau Israel ange laa, ma de gau haimeedabu, ma de aamuli o Levi e nnoho i lodo aduhale o Judah ange laa, dahi ma dahi i hongaga de gelegele o olaadeu dubuna madagidagi.

21 Aagai de gau e haia hegau i de hale daumaha ne nnoho i Ophel, gai luoolaadeu dagi go Ziha ma Gishpa.

22 Gai taane e dagina dangada i de aamuli o Levi i Jerusalem go Uzzi, tama daane a Bani, tama daane a Hashabiah, tama daane a Mattaniah, tama daane a Micah. Ia go dahi hagadiilinga o Asaph, go gilaadeu e haia hegau o taahili i de hale o de Maadua.

23 Gai de hodoologi ne hagamodu ange gi de gau daahili de hai e hagatau ai alaadeu hegau i laangi alodahi.

24 Gai Pethahiah tama daane a Meshezabel, mai i de hagadiilinga o Zerah tama daane a Judah, go sui o de hodoologi i mee alodahi e hai ange gi dangada.

25 Gai dagodo o denga aduhale vaaligiligi ma denga veelenga iai, hanu mai i de aamuli o Judah e nnoho i Kiriath Arba ma ono aduhale vaaligiligi, ma Dibon ma ono aduhale vaaligiligi, ma Jekabzeel ma ono aduhale vaaligiligi,

26 ma Jeshua, ma Moladah, ma Beth Pelet,

27 ma Hazar Shual, ma Beersheba ma ono aduhale vaaligiligi,

28 ma Ziklag, ma Meconah ma ono aduhale vaaligiligi,

29 ma En Rimmon, ma Zorah, ma Jarmuth,

30 ma Zanoah, ma Adullam ma olaadeu aduhale vaaligiligi, ma Lachish ma mommee iai ono veelenga, ma Azekah ma ono aduhale vaaligiligi. Gilaadeu ne nnoho i Beersheba ga dae ai gi de geelonga go Hinnom.

31 Gai dangada de aamuli o Benjamin ne nnoho i Geba ga dae ai gi Mikmash, ma Aija, ma Bethel ma ono aduhale vaaligiligi,

32 ma Anathoth, ma Nob, ma Ananiah,

33 ma Hazor, ma Ramah, ma Gittaim,

34 ma Hadid, ma Zeboim, ma Neballat,

35 ma Lod, ma Ono, de geelonga e nnoho ai denga labagau.

36 Gai hanu hagabuulinga o de aamuli o Levi i Judah ne nnoho i de vaaenga o Benjamin.

## 12

### *De gau haimeedabu ma de aamuli o Levi*

1 Gai aanei de gau haimeedabu, ma hagadiilinga o Levi ne aahe mai madali Zerubbabel tama daane a Shealtiel, ma Jeshua:

go Seraiah, ma Jeremiah, ma Ezra,

2 ma Amariah, ma Malluk, ma Hattush,

3 ma Shecaniah, ma Rehum, ma Meremoth,

4 ma Iddo, ma Ginnethoi, ma Abijah,

5 ma Mijamin,\* ma Maadiah, ma Bilgah,

6 ma Shemaiah, ma Joiarib, ma Jedaiah,

7 ma Sallu, ma Amok, ma Hilkiah, aama Jedaiah.

\* 12:5 Mijamin, aabe go Miniamin.

Aanei de gau haimeedabu maolunga ma olaadeu daina i de masavaa o Jeshua.

<sup>8</sup> Denga hagadiilinga o Levi: go Jeshua, ma Bin-nui, ma Kadmiel, ma Sherebiah, ma Judah, aama Mattaniah, go gilaadeu ma ono daina e dagina denga daahili e hagarahe ange ai de abodonu.

<sup>9</sup> Bakbukiah ma Unni ma olaau soa ange laa e tuu i de baasi laa i de masavaa o taumaha.

<sup>10</sup> Gai Jeshua ne hagadili Joiakim, Joiakim ne hagadili Eliashib, Eliashib ne hagadili Joiada,

<sup>11</sup> Joiada ne hagadili Jonathan, gai Jonathan ne hagadili Jaddua.

<sup>12</sup> Gai laangi o Joiakim, gai aanei dagi o denga hagadiilinga o de gau haimeedabu:

mai i de hagadiilinga o Seraiah go Meraiah;

mai i de hagadiilinga o Jeremiah go Hananiah;

<sup>13</sup> mai i de hagadiilinga o Ezra go Meshullam;

mai i de hagadiilinga o Amariah go Jehohanan;

<sup>14</sup> mai i de hagadiilinga o Malluchi go Jonathan;

mai i de hagadiilinga o Shebaniah go Joseph;

<sup>15</sup> mai i de hagadiilinga o Harim go Adna;

mai i de hagadiilinga o Meraioth go Helkai;

<sup>16</sup> mai i de hagadiilinga o Iddo go Zechariah;

mai i de hagadiilinga o Ginnethon go Meshullam;

<sup>17</sup> mai i de hagadiilinga o Abijah go Zicri;

mai i hagadiilinga o Miniamin ma Moadiah, go Piltai;

<sup>18</sup> mai i de hagadiilinga o Bilgah go Shammua,

mai i de hagadiilinga o Shemaiah go Jehonathan;

<sup>19</sup> mai i de hagadiilinga o Joiarib go Mattenai;

mai i de hagadiilinga o Jedaiah go Uzzi;

<sup>20</sup> mai i de hagadiilinga o Sallai go Kallai;  
mai i de hagadiilinga o Amok go Eber;

<sup>21</sup> mai i de hagadiilinga o Hilkiah go Hashabiah;  
mai i de hagadiilinga o Jedaiah go Nethanel.

<sup>22</sup> Gai dagi o denga hagadiilinga o Levi, i de masavaa o Eliashib ma Joiada, ma Johanan, ma Jaddua, aama de gau haimeedabu, ne daohi olaadeu ingoo, i de masavaa o Darius, de hodoologi o Persia.

<sup>23</sup> Gai dagi o denga hagadiilinga o de aamuli o Levi ne daohi olaadeu ingoo i de beebaa e daohi ai laa hegau ga dae ai loo gi de masavaa o Johanan tama daane a Eliashib.

<sup>24</sup> Gai dagi o de aamuli o Levi: go Hashabiah, ma Sherebiah, ma Jeshua tama daane a Kadmiel, aama olaadeu daina e tuu laa i de baasi ange laa, e hagadau hagahe ange ai de abodonu ma de tuhi, bei dagodo muna a David, taane o de Maadua.

<sup>25</sup> Gai Mattaniah ma Bakbukiah, ma Obadiah, ma Meshullam, ma Talmon, ma Akkub, go dangada e hagaloosia denga mommee doange i gao-gao denga haitoga.

<sup>26</sup> Gilaadeu nei ne hai hegau i de masavaa o Joiakim tama daane a Jeshua, tama daane a Jozadak, aama de masavaa o de goobenaa go Nehemiah, aama Ezra tangada haimeedabu ma sisi.

### *De hagadabu o de buibui o Jerusalem*

<sup>27</sup> Gai de masavaa ne hagadabu ai de buibui o Jerusalem, gai gilaadeu ne ssala dangada de aamuli o Levi mai i mommee alodahi olaadeu e nnoho ai laa, ga gaamai gilaadeu gi Jerusalem e hai ai taonga i de malangilangi, ma de hagahe ange de abodonu madali denga daahili, aama de

hagandangidangi i denga *cymbal*, ma *harp*, aama *lyre*.

<sup>28</sup> Gai de gau daahili ga loomai i denga mommee i luu baasi o Jerusalem, aama mai i aduhale i luu baasi o Netophah,

<sup>29</sup> mai i Beth Gilgal, ma mommee o Geba ma Azmaveth, go hiidinga de gau daahili ne hagatuu olaadeu aduhale i luu baasi o Jerusalem.

<sup>30</sup> Gai de gau haimeedabu ma de hagadiilinga o Levi ga hagagilimalali gilaadeu i mua, gai gilaadeu ga hagagilimalali hogi dangada, ma denga haitoga, ma de buibui.

<sup>31</sup> Gai au ne hai denga dagi o Judah gi nnoho i hongade buibui. Au ne hai hogi e lua hagabuulinga daahili gi hagarahe ange de abodonu. Dahi hagabuulinga e hano gi de baasi madau, gi de buibui o de Haitoga o Duudae.

<sup>32</sup> Hoshaiiah ma dahi luu baasi o denga dagi o Judah e daudali adu i olaadeu dua,

<sup>33</sup> ma Azariah, ma Ezra, ma Meshullam,

<sup>34</sup> ma Judah, ma Benjamin, ma Shemaiah, ma Jeremiah,

<sup>35</sup> ma hanu dama a de gau haimeedabu ma alaadeu *trumpet*: go Zechariah tama daane a Jonathan, tama daane a Shemaiah, tama daane a Mattaniah, tama daane a Micaiah, tama daane a Zaccur, tama daane a Asaph,

<sup>36</sup> madali ono dangada, go Shemaiah, ma Azarel, ma Milalai, ma Gilalai, ma Maai, ma Nethanel, ma Judah, ma Hanani, madali denga mee hagandangidangi a David taane o de Maadua. Gai Ezra tangada sisi e hano i olaadeu mada i mua.



<sup>37</sup> Gai gilaadeu ne duudagi mai i de Haitoga o de Vai ga loage i denga vae gaagenga o de Aduhale o David, gi de mommee e hanage ai laa gi de buibui ga hulo ga ui i de hale o David ga hulo ai gi de Haitoga o denga Vai i baasi gi dua.

<sup>38</sup> De lua hagabuulinga daahili ne hagahe ange de abodonu ga hulo ai gi de baasi gee. Gai au ne daudali ange i gilaadeu i hongaga de buibui, madali dahi luu baasi o dangada, ga hulo ai ga ui i de Hale Dagitilo o denga Mommee Dao Mee ga hulo ai gi de bae lahalaha,

<sup>39</sup> ma laa hongaga de Haitoga o Ephraim, ma de Haitoga o Jeshanah, ma de Haitoga o denga Mamu, ma de Hale Dagitilo o Hananel, ma de Hale Dagitilo o de Lau, ga tae ai gi de Haitoga o denga Ssiibi; gilaadeu ne hulo ga tae gi de Haitoga o de Gau Hagaloosi.

<sup>40</sup> Gai luu hagabuulinga daahili e hagahe ange laa de abodonu, ne hulo ga tuu i olaadeu mommee i de hale o de Maadua, gai au ne duu hogi i kilaa madali denga dagi ange laa,

<sup>41</sup> gai de gau haimeedabu e tuu ma alaadeu *trumpet*: go Eliakim, ma Maaseiah, ma Miniamin, ma Micaiah, ma Elioenai, ma Zechariah, aama Hananiah;

<sup>42</sup> gai Maaseiah, ma Shemaiah, ma Eleazar, ma Uzzi, ma Jehohanan, ma Malkijah, ma Elam, aama Ezer i kilaa hogi. Gai de hagabuulinga daahili go Jezrahiah e dagina.

<sup>43</sup> Gai gilaadeu ne hai denga sigidaumaha lago-lago mmao i de laangi laa, ma de malangilangi, go hiidinga de Maadua gu hagamalangi-langi gilaadeu i de malangilangi laumalie. Denga

haahine ma gauligi gu malangilangi hogi, gai delaadeu malangilangi i Jerusalem gu langona i de mommee mmao.

<sup>44</sup> De masavaa laa gai ne hili ange hanu daane gi diiloo ange denga mommee doange e dugu ai laa mee a dangada e daohi age, ma denga huamanu e hagihagi i taamada, ma mee o dahi diba i diba e madaangahulu. Gai gilaadeu gi hagabudulia mee nei mai i veelenga o denga aduhale i luu baasi denga aduhale, go tiba gu dugu ange laa gi de gau haimeedabu, ma de aamuli Levi bei de hai gu sisi ai i de hainga. Go hiidinga dangada o Judah ne malangilangi i hegau a de gau haimeedabu ma de hagadiilinga o Levi.

<sup>45</sup> Gai gilaadeu ne hai hegau a delaadeu Maadua, aama hegau o de hagagilimalali, gai e bei ai hogi de gau daahili ma de gau hagaloosi haitoga, bei de hai a David ma dana dama go Solomon gu tala ange ai.\*

<sup>46</sup> Madagidagi loo i de masavaa o David ma Asaph, gai e hanu e dagina de gau daahili, ma denga daahili tuhi ma de hagaathe ange ai de abodonu gi de Maadua.

<sup>47</sup> Laangi o Zerubbabel ma Nehemiah, gai de gau Israel alodahi ne gaavange diba a de gau daahili ma de gau hagaloosi haitoga i dahi laangi ma dahi laangi. Gilaadeu ne vvae hogi tiba a de hagadiilinga o Levi ange laa, gai denga hagadiilinga o Levi ne vvae gee tiba a denga hagadiilinga o Aaron.

## 13

---

\* [12:45](#) [1 Ch 25.1-8](#); [26.12](#)

*De daudali o dangada i hainga a de Maadua*

<sup>1</sup> De laangi huu ne dau ange ai de beebaa a Moses gi dangada, gai gilaadeu ne gidee e sisi i ono lodo bolo de gau Ammon ma de gau Moab e dee maua i de daumaha madali dangada o de Maadua ga hano ai,\*

<sup>2</sup> go hiidinga gilaadeu tee loomai e hedae ange gi de gau Israel ma de gaamai gai ma vai gi gilaadeu, aagai gilaadeu ne hagao ange Balaam gi hagamalaia ina de gau Israel. (Gai taadeu Maadua ne sui de malaia laa gi se manuuia.)\*

<sup>3</sup> De masavaa a dangada ne langona ai hainga laa, gai gilaadeu ne vvae gee de gau henua gee alodahi mai i de gau Israel.

<sup>4</sup> I mua de hai mee nei, gai tangada haimeedabu go Eliashib ne hili, gi diiloo ange denga mommee doange mee, i de hale o demaadeu Maadua. Gai taane nei se dangada niio Tobiah,

<sup>5</sup> gai ia ne hai dahi aabi laumalie moo Tobiah, go de mommee nogo dugu ai denga *grain* e hai ai ssigidaumaha, ma *frankincense*, ma goloa o de hale daumaha, aama tahi diba i diba e madaangahulu o denga *grain*, ma uvaini hoou ma lolo e gaavange gi hagadiilinga o Levi, ma de gau daahili, ma de gau hagaloosi haitoga, ma mee gu daohi age e gaavange gi de gau haimeedabu.

<sup>6</sup> Aagai de masavaa e hai ai mee nei, gai au e dee maleva i Jerusalem, go hiidinga de matolu ma lua ngadau o Artaxerxes ne hodoooligi ai i Babylon, gai au ne ahe gi daho de hodoooligi. Muli mai gai au ne dangidangi ange,

---

\* **13:1** Deut 23.3-5      \* **13:2** Gen 19.37, 38; Num 22.1-6

<sup>7</sup> ia gi dugua mai au gi ahe gi Jerusalem. Deenei dagu hai ne iloo ai dagodo hegau baubau a Eliashib ne hai, i dana gaavange dahi aabi i lodo buibui o de hale o de Maadua gi Tobiah.

<sup>8</sup> Gai au gu kona donu dogu dee malangilangi, gai au ga maga goloa alodahi o Tobiah gi tua de aabi laa.

<sup>9</sup> Gai au ne hai hanu gi hagagilimalali ina denga aabi laa; gai au ga hagaahē ange denga goloa o de hale o de Maadua madali denga *grain* e hai ai ssigidaumaha, aama denga *frankincense* gi kilaa.

<sup>10</sup> Au ne iloo hogi bolo tiba a denga hagadiilinga o Levi gu dee gaavange gi gilaadeu, deelaai, denga hagadiilinga o Levi ma de gau daahili e haia hegau gu aahē gi de mommee iai alaadeu veelenga.\*

<sup>11</sup> Gai au ga hagasee denga dahi, ga hai ange, “Gu aha gu dee anga ange ai naa goodou gi de hale o de Maadua?” Gai au ne hagabuni mai denga hagadiilinga o Levi ga hagaahē ange gilaadeu gi olaadeu duuhanga hegau.

<sup>12</sup> Gai dangada alodahi o Judah ga gaamai dahi diba i diba e madaangahulu o denga *grain*, ma uvaini, aama lolo gi lodo mommee doange.\*

<sup>13</sup> Gai au ne hili tangada haimeedabu go Shelemiah, ma Zadoktangada sisi, ma Pedaiiah dahi hagadiilinga o Levi gilaadeu gi diiloo ange denga mommee doange laa, gai au ne hili Hanan tama daane a Zaccur, tama daane a Mattaniah, gi balea ange gilaadeu, go hiidinga denga daane nei e hai hegau i de mee abodonu. Gai go gilaadeu e

---

\* **13:10** Deut 12.19      \* **13:12** Mal 3.10

duuhaa ange denga mee gi olaadeu dangada ange laa.

<sup>14</sup> Dogu Maadua, manadua mai au i hiidinga o de mee nei, gai koe gi dee sooloa agu hegau ne hai i de muna abodonu, ange gi de hale o dogu Maadua ma ono hegau.

<sup>15</sup> Laangi laa gai au ne gidee hanu dangada o Judah e dagadagahi denga *grape* i de mommee kumi uvaini i de laangi o Sabbath, ma de hagauda mai denga noodangaa *grain* i hongaa denga *donkey*, ma uvaini, ma *grape*, ma *fig*, aama denga hagadaa-gangaa mee alodahi ma e gaamai gi Jerusalem i de laangi o Sabbath. Gai au ga hai ange gilaadeu gi dee hagao ina gai laa i de laangi.\*

<sup>16</sup> Gai hanu dangada mai i Tyre, e noho laa i Jerusalem, ne gaamai hanu mamu, ma denga hagadaagangaa goloa alodahi gi Jerusalem, i de laangi o Sabbath, e hagao ange gi dangada o Judah.

<sup>17</sup> Gai au ne hagasee de gau aamua o Judah, ga hai ange gi gilaadeu, “Se hegau baubau bee hee oodou gu hai nei, gai goodou ga hagangadi mee ai de laangi o Sabbath?”

<sup>18</sup> E aha, e dee aanei hogi hegau a oodou dubuna ne hai, gai taadeu Maadua ga hai ai laa gi hai ngadaa gi gidaadeu ma de aduhale nei? Gai goodou ga hai naa gi kii ange de laumalie de bole e humai gi hongaa o Israel, i doodou hagangadi mee Sabbath.”

<sup>19</sup> Gai de masavaa huu ne gohu denga haitoga o Jerusalem i mua de dae mai o Sabbath, gai au ga hai gilaadeu gi bonodia denga haitoga, gai e

---

\* **13:15** Exo 20.8-10; Deut 5.12-14; Jer 17.21-22

dee ahe ange e hhuge ga dae ai gi de ui de laangi o Sabbath. Gai au ne hai hanu ogu daane hai hegau gi hagaloosia denga haitoga alodahi, gi deai ai mee e hagenda mai gi lo te aduhale i de laangi o Sabbath.

<sup>20</sup> Gai ne dahi be lua hanonga o de gau hagao mee, ma dangada e hagao ina denga hagadaagan-gaa goloa alodahi, ne sseni ai i tua de buibui o Jerusalem.

<sup>21</sup> Aagai au ne basa ange gi gilaadeu, ga hai ange, “Gu aha gu sseni ai naa goodou i gaogao de buibui i de boo? Noo goodou e aahe ange e hai de hegau nei, gai au ga booboo goodou e noonoa.” Dua de masavaa laa gai gilaadeu tee aahe mai i de laangi o Sabbath.

<sup>22</sup> Gai au ne hai ange gi hagadiilinga o Levi gilaadeu gi hagagilimalali ina gilaadeu ma gi loomai hagaloosi ina denga haitoga, gi maua ai i de hai gi dabu de laangi o Sabbath.

Dogu Maadua, manadua mai hogi au i de mee nei, gai abodonu mai gi de au gi bei dagodo o doo aloha laumalie.

<sup>23</sup> Gai au ne gidee hogi i laangi laa bolo hanu daane Judah gu hai bodu ange gi denga haahine o Ashdod, ma haahine o Ammon aama Moab.\*

<sup>24</sup> Gai hanu alaadeu gauligi e pasa donu i muna Ashdod, aabe go hanu muna ange, gai gilaadeu e dee pasa i muna a de gau Judah.

<sup>25</sup> Gai au ga hagasee gilaadeu ma de hagamalaia gilaadeu. Au ne daa hanu daane i olaadeu magavaa ga vele olaadeu biho. Au ne hai hogi gilaadeu gi hagatoo donu i de ingoo o de Maadua, gi

---

\* **13:23** Exo 34.11-16; Deut 7.1-5

hagataba, “Goodou e dee gaavange oodou damaa hine gi hai bodu ange gi alaadeu dama daane, be kave hanu alaadeu damaa hine gi hai bodu ange gi oodou dama daane, aabe gi hai bodu adu gi goodou.

<sup>26</sup> E aha, e dee aanei hogi hegau a Solomon ne hai ga haisala ai ia? Gai e deai ange donu se hodoologi e bei ono dagodo i magavaa o denga huaahenua soa. Gai de Maadua ne aloha i de ia, ga hai ia gi hodoologi i Israel alodahi, aagai ia ne haisala hogi i hiidinga o denga haahine henua gee.\*

<sup>27</sup> E aha, goodou e hai naa hogi gi langona e gi-maadeu bolo goodou e hai hogi de hegau baubau mmao nei, goodou e dee hai hegau ange gi taadeu Maadua i de mee abodonu, i doodou hai bodu ange gi denga haahine henua gee?”

<sup>28</sup> Gai e dahi hogi dama daane a Joiada, tama daane a Eliashib, tangada haimeedabu maolunga, se saulaba niio Sanballat, taane Horon. Gai au ne alualu ia gi hano gee mai i dogu mommee iai.\*

<sup>29</sup> Dogu Maadua, manadua alaadeu hegau, go hiidinga gilaadeu ne hai ga dee gilimalali tuulanga o de gau haimeedabu aama de hagatoo donu hagaheloongoi a de gau haimeedabu ma denga hagadiilinga o Levi.

<sup>30</sup> Au ne hagagilimalali gilaadeu mai i denga henua gee alodahi, ga gaavange hegau a de gau haimeedabu, ma de aamuli o Levi, gai dahi ma dahi gi haia ana hegau;

---

\* **13:26** 2 Sa 12.24-25; 1 Ki 11.1-8      \* **13:28** Neh 4.1

<sup>31</sup> gai au ne hai gi hanu lahhie e hai ai ssi-  
daumaha, i de masavaa gu hagamodu ange, aama  
de masavaa o dena huamanu i taamada.

Dogu Maadua, manadua mai au i doo abodonu.



**De Beebaa Dabu**  
**The Holy Bible in the Nukuoro language of Micronesia**  
copyright © 2022 Wycliffe Bible Translators, Inc.

Language: Nukuoro

Contributor: Wycliffe Bible Translators, Inc.

All rights reserved.

2025-03-14

---

PDF generated using Haiola and XeLaTeX on 13 Mar 2025 from source files  
dated 14 Mar 2025  
8ec6bba8-0c5e-54dd-94ca-afb07f24d254